

光緒江西通志

江西通志卷一百三十九

列傳六

南昌府六

國朝

盧圖龍字毓仁武甯人父歿始生母周教養成立八歲能讀左傳及秦漢文字家貧無書假之故家寓目成誦人咸異之順治初流寇入境圖龍負母避亂山中子斌憲初脫襁褓襍勢不能兩全遂棄子灌莽間比亂定斌憲亦無恙歲大饑民將不靖圖龍言於有司發倉粟全活甚眾金聲桓據南昌武甯守將鄧雲龍應之圖龍幾不免及大兵至將屠城圖龍出見大帥曰公所以至此者爲民故也今以雲龍故居屠城城中民獨非朝廷赤子乎願熟計之帥曰諾圖龍曰請爲將軍招致雲龍遂說

之就撫既舉於鄉官汀州司理汀多盜吏不能治圖龍至嘆曰此輩非能盜也令歸順許自新盜爲屏迹旋以憂歸圖龍官閩中嘗與同官歎周亮工獄主者惡亮工周內之圖龍不可勿署名主者私爲之署及亮工再就質圖龍奮筆具狀同官亦直圖龍事始平反已而以前後異議逮亮工廷鞫併逮圖龍圖龍性卞不能忍對簿憤激甚一慟殆絕後亮工事雪圖龍竟抑鬱先卒亮工爲志其墓

府志

宋士吉字九常奉新人順治歲貢生性至孝母疾衣不解帶投廣信永豐教諭擢浙江餘杭知縣甫下車值劇寇唐起凡等爲亂士吉密爲閒諜誘擒其渠民始安初江南漕米留給南軍當事思委責於杭督撫檄以杭漕

抵給士吉陳牘言其不可事得寢茗水發源天目邑當
奔注之衝因周覽地勢捐築吳家險唐關等十六壩自
是無水患在餘杭十年民愛之如父母遷保安知州餘
杭民爲立祠治保安有聲如餘杭

府志
縣志

諶名臣字令興南昌人順治鄉舉司鐸盱郡遷國學出
戶部郎擢刑科給事中歷禮工二科請終養歸以勸母

卒

白志

張焜字大啟南昌人順治鄉舉知永壽縣縣七被寇躪
城久堙焜至僦居麻亭寨築城結茅民始甯宇俗質樸
諸生百四十餘年不一雋焜爲之建學設月課己酉壬
子登賢書者三人邑故無井澗飲病渴焜披榛步尋得
泉山巔疏引入城後攷知爲宋呂大防惠民泉故趾蓋

涸廢數百年矣是歲境內穀多雙穗或至六穗八穗吳
三桂反滇隴蜀皆動搖莫洛經略漢中檄焜參贊軍務
積勞感疾卒

白志

朱天甯字文靜進賢人以五經中式順治進士授長山
令戊子盜殺其母馳歸哭訴於縣爲發徒禽盜首梟示
天甯取其心肝祭母復單騎縛盜十餘人盜蜂聚遂遇
害

安志

杜果字登聖新建人順治進士選翰林院庶吉士改御
史巡按浙江多政績累官濟甯兵備道致仕家居二十
餘年甘貧樂道旣歿以故衣敝衾殮聞者傷之

崇禎錄

朱紱字五任進賢人順治進士選庶吉士改御史巡視
七省漕務又視河東鹽課惠商革陋一如視漕之潔擢

太僕少卿累遷都察院左僉都御史致政歸

白志

萬中僑南昌人父季誠有隱德巡按某聞而造焉脫簪
贈曰爲後人朝簪兆明年生中僑旣弱冠爲學使黃貞
父所知順治辛卯舉於鄉教諭廬陵士經其指授者多
得雋尤賞張貞生引與朝夕磨礪未幾貞生冠南宮

錄

崇祀

涂日章字大章奉新人順治鄉舉爲諸生時督學蔡懋
德奉崇禎敕書選士日章與揭重熙陳際泰楊廷麟並
前列翕然稱得人日章之文遂走天下所交徐世溥陳
宏緒諸人咸相推重旣舉鄉試一走京華卽棄去築室
白石山號竹疆園聚書萬卷丹鉛評注無虛日

府志

楊西狩字華覲進賢籍南昌人順治進士初任工部主

事升員外轉兵部郎中擢陝西提學道居官丰度端謹以清廉名卒於任所著有存笥橐

白志

張士驥字駘菴南昌人順治鄉舉甯都教諭戊子之亂士驥奉父母避兵山莊游騎猝至母王氏投河死士驥痛哭且殉以父命止後遭橫逆家產蕩析負笈四方籍東脩以養父父歿數年始授官士驥與甯都魏禕善年五十從遊者將稱觴屬叔子爲之辭士驥謝曰痛先人不逮苜蓿之奉尙何壽之足言叔子諾遂不舉觴而別爲文以壽後告歸卒

府志

陳思珊字翠池武甯人順治鄉舉授南城縣教諭幼有至性事寡母左右無違順治乙酉流寇攻縣珊負母走避寇至不能脫匿母蓬蒿中珊伏翼其上賊過見之以

刃擊珊珊僞爲死狀血濺衣領少頃後騎至又擊之首
被刃者三賊以爲死乃去珊卒掖母共出旣官南城前
學官某以宿怨被誣罹逆黨珊知其冤力爲營救時南
城諸生以從逆受誣者數十人按之皆無驗珊悉出之
累官瑞州教授年八十七卒

府志
縣志

郭曰燧字遂人南昌人順治進士由郎中出守台州時
海寇陸梁曰燧身先士卒捍城緝賊多方招撫民以安
堵郡舊有方正學祠久廢曰燧捐資修復并搜輯遜志
齋文集刻之治台七年兩攝巡道多善政以母年高乞
終養歸里三十餘年杜門不履城市孫文正康熙甲子
鄉薦任福建沙縣知縣

洪若皋政
績錄序

涂士鳳字子威奉新人歲貢生少沈慧父國安甚愛之

國安兄國科無子欲得士鳳爲後而難於言國安會兄意竟以繼之國安故名諸生選於經士鳳幼時父口傳經義輒曉大意性孤介落落寡合惟從從祖日章士達游與閔鉞彭宏謨友偃蹇不遇年四十九始以明經貢絕意進取杜門窮經考正百家彙生平著述名安我編

府志
縣志

賈國璵字非珉南昌人順治舉人授陝西華亭知縣請豁積逋五千兩民皆感悅未幾致仕歸卒年八十

白志

鄒度珙字謙受新建人順治進士改庶吉士授檢討爲文自出機杼庚子典試楚閩會元金德嘉侍講鄭之謙太僕楊佐國皆其所取士生平不樂仕進急流勇退晚節益高日以觴詠自娛所著詩文多散軼

白志

羅士毅字恕齋新建人順治進士知廣東信宜縣多善政鬻產捐贖民逋二千餘兩審豁冤獄死罪十餘人高州移鎮兵有攜民妻子去者蠲俸贖回信宜民立同春祠祀之報政稱粵東第一升河南陝州旋致仕歸率僮僕耕作飢粥不供怡然不以介意所著有適園詩文等

集

安志

劉崑字隱之南昌人順治進士知東鹿縣擢雲南同知吳三桂反不屈被杖遣戍騰衝衛滇南平以原銜補登州同知擢常德知府致仕歸卒年七十九

白志

陸履敬豐城人順治進士例授縣令自以體弱不勝簿書不赴凡令於豐城者有興革必造廬商推滇黔告警城中人驚竄入山令禁止之履敬曰愚民懾於虛聲耳

寬其出入則遷者返矣請出示聽民自便令懸三日民果復歸家食數十年著有豐邑志前後藥餘草小雲閒集碧蓮園課若干卷

白志

吳志灝字方程南昌人順治進士授零陵知縣滇逆叛永鎮兵變灝抗節不屈奉百歲老母避山中事平出謁選當彙題留補以母喪辭歸林下二十餘年著有素素

山房彙立誠集

白志

徐世溥字巨源新建人良彥季子幼隨父任學殖日富年十六補博士弟子員東鄉艾南英聞世溥名與約爲兄弟江南姚希孟同里萬時華康小范輩咸相推重世溥才雄氣盛一往自遂兼工書法戶外屢常滿繼而屢困鑠閤值滄桑之變匿景杜門絕意進取順治辛卯壬

辰陳名夏欲修徵辟故事直指使者親式其閭又作書遣司理持禮幣往山中致之堅拒不納司理去後盜乘夜入室索其禮幣不知初未嘗受也盜不之信以火炙之至死乃去

盧宜撰傳 謹案世薄爲盜所殺事詳見趙彙編曝雜記此云入室索幣至死乃去

疑非事實蓋有所諱也

彭士望字躬葺本姓危南昌人少有雋才講求經世之學崇禎己卯父哲病且革閱邸抄見漳浦黃道周平臺召對語拊枕嘆曰鐵漢也顧謂士望當以爲師父卒士望旣治喪畢卽裹糧行謁道周道周已重觸帝怒繫獄士望傾身營護會太學生涂仲吉上疏下詔獄予杖辭連士望禍幾不測後道周論戍事乃解尋參揚州幕未久辭歸與林時益徙家甯都時江右講學者星子曰髻

山南豐曰程山甯都曰易堂皆以名節詩文相砥礪士望尤以躬行爲本名其文曰恥躬堂集鄉人有死節者其子幼被掠士望傾橐贖之爲娶婦急風義篤故舊至

老不衰卒年七十四

贛州府志

林時益字確齋南昌人本明宗室名議霧與彭士望爲友順治初江洪閒數被兵兩人謀卜居士望亟言金精諸山可爲嶺北耕種處乃變姓名攜家以往康熙七年詔明故宗室子孫眾多竄伏山林者歸還田廬復其姓氏而時益寄籍甯都久弗樂歸甯都人亦習呼之曰林確齋先是父統鎮以崇禎進士令江夏卒官嘗修城支帑數萬金黠吏匿其籍時益覩縷追憶條寫而目算之無所爽攝令驚歎以爲神然自是得嘔血疾比遷甯都已盡破

其產結廬冠石傭田而耕井其力不食子楫孫門人吳
正名任安世任瑞輩皆帶經負鋤冠石宜茶時益以意
制之香味擬陽羨所謂林界者也工書喜爲詩晚又好
禪以疾故未嘗一他適頽然耆龐見者目爲老農老僧
如是三十年卒

贛州府志

夏日至字子長豐城人貢生性清介家極貧惟族兄太
遇資給之他人餽贈不受也作文務獨造性疏放不自
存稿嘗應省試偕涂無功入書肆閱載籍恣論古今先
有長者在肆默無所語聞日至言論乃稱歎首肯問姓
名則臨川陳際泰也遂訂忘年交既領薦不復就試布
政使莊應會命爲白鹿賦奇其才欲薦之力辭

府志

歐陽斌元字憲萬新建人幼奇慧讀書目十行下終身

不忘爲諸生受知蔡懋德侯峒曾兩學使以國士禮之同邑姜曰廣清江楊廷麟尤相推重廷麟稱斌元奇才博學景略流亞與樂平王綱南昌彭士望爲兄弟交勉礪德業規切過失講求經濟嘗爲侍郎呂大器草疏特糾馬士英二十四大罪又嘗佐督師史可法幕府可法特薦推官贊畫士英知呂疏出斌元手銜之不用歸隱

順治六年卒年四十四

彭士望書
十交贊後

楊益介字友石新建人明諸生督學蔡懋德侯峒曾並以國士目之甲申之變益介痛不欲生聞李自成死田夫乃狂喜偕妻隱上天峯麓構冰雪堂作人社與同志之士講學山居絕糧往往采蕨而食巡撫蔡士英耳其名檄縣聘至鹿洞書院益介以疾辭謂士之守道猶友

之守節某明之遺民一水一粟野性所甘而又以沽名人其謂我何因更其字曰守道先是益介居會城曹文衡以經學教授鄉里同氣類明終兩人皆退避文衡更名曰以衡與益介不渡章江者殆三十年益介有弟曰益俞能文亦不仕益俞死介爲哭弟詩甚悲其友若宋之盛魏禧彭士望徐世溥何一泗程元極皆守志不易同隱於上天峯者曰徐思爵字修仲

府志

蔡憲陞字非石南昌人順治戊子兵亂鄉人皆走避憲陞以父病留不去會河水溢田廬皆沒四境絕煙火憲陞日持空器捕水中小魚作羹供父食賊驅之浚濠憲陞叩頭流血乞留餘生以養父賊義而舍之康熙乙卯憲陞弟之祥以陷賊被誣全家繫獄憲陞走千金坡叩

簡親王馬首呼冤不得近鞭之數百越日始甦王以其詞付巡撫董衛國冤始白初憲陞年十六補縣庠生學使蔡懋德器之蔡巡撫三晉走書招之以母老辭及蔡殉難憲陞遂不入場屋曰吾以報雲怡先生之知我雲

怡懋德別字也

府志

劉斯琦明大學士一燬子遭亂仿杜工部北征詩作憶

篇陳宏緒朱徽皆稱之一燬又有孫元釗能詩

府志

危士時字習生南昌人少讀書不售爲賈又不成乃挈弟靜生往甯都爲人傭耕種茶芋或剝穀樹皮爲紙得錢以食家人靜生善病終年兀坐惟士時是賴士時爲人豪爽立名義雖甚貧揮金無吝色其往甯都也實依其從兄達生達生者改姓名爲彭士望者也士時工詩

魏禧嘗爲之序

府志
縣志

衷赤字道楠南昌人明末諸生嘗集義勇保衛鄉里寇盜無敢犯者順治二年大兵下江西都督府募將材赤應募授守備銜三年隨勦撫州建昌廣信諸土寇悉平之遂從征南大將軍博洛進福建攻黃鳴駿於仙霞關克浦城以功加遊擊銜進平建甯延平諸府加叅將銜土寇陳泰鍾等萬餘圍建甯赤出戰連殺賊賊益眾戰於東門陣亡子化樞諸生僕人麻升同歿於陣

府志

涂世忠初名以濬字哲卿新建人明諸生好讀兵法習武事里中諸生竊笑之愈益自負入

國朝靖南王耿繼茂軍出江西奇其才更名世忠隸總鎮標下從征連陽賊郭秀科再征十八山老虎峒有功授

千戶李定國悉眾襲肇鎮鋒銳甚世忠直出衝陣克之禽其將羅成基張世新會江水大漲定國乘船下德慶羅定連灘西甯封川梧州諸郡縣爭告急世忠赴各江口禦賊尋調防開建定國盡師來攻世忠與相持數日禽其將李泰魏龍梁著定國師大潰隨官軍征靈山復平南等縣調勦廣西南泰州禽賊魁陳奇策江夏王等康熙中調勦臺灣禽劉自忠屢立奇功僅遷一秩官大鵬營守備世忠不爲沮廣西巡撫傅宏烈以大將軍討吳三桂世忠隨征授叅將會與賊將馬寶等遇力戰或諷以眾寡不敵宜且退世忠憤然曰焉有領兵討賊而反避者世忠男子不能爲此遂赴鬪不屈死時年纔逾

五十事平

世蔭

府志
縣志

徐月吉字元功武甯人幼孤流寓江左以千總從昭勇將軍楊捷征西梁山克之授明威將軍尋征福建漳泉廈門直入寇營獲其渠帥以歸再從大兵勦臺灣戰江陵旋駐金門屯陳倉大小二十餘戰身無完膚事定功不獲賞後從征雲貴身冒矢石連拔一十九砦晉左都督署甯夏鎮標遊擊又從征噶爾丹月吉爲先鋒大克之授花馬池東協副總兵以老乞休

府志

周尙功字君輔豐城人以材官授略陽守備轉福山營都司海寇犯江南尙功率兵破賊擢福建遊擊山賊李月高聚眾自固尙功絕糧路設伏禽渠殲賊黨陳楚生朱漢明調陝西興安鎮叅將再調四川以疾作致仕

府志

謹案

豐城縣志載尙功平諸逆黨調陝西興安鎮遊擊再調四川甯甯中營遊擊吳逆亂誘脅不從去官居

永甯康熙十九年冬賊將胡國柱等據城城陷尙功被執不屈賊殺之妻李氏長子瀨次子瀨合門二十口俱盡節入祀昭忠祠孫元凱世襲恩騎尉所載與府志大異事關忠義不敢汨沒附錄之

盧達字瑞芝武甯人康熙中平叛將楊富餘黨達有戰功後入行伍授百戶從征積功晉昭武將軍黔滇告警隨簡親王勦賊連奏捷至鴨池河無舟造筏呼風而渡賊望見之不戰走雲貴初定馬寶餘黨尙寇四川達請往偵得其虛實捲甲蹙之賊隨滅班師策勦官左都督管湖廣施州營遊擊事達起行伍老乃得官出入於矢石閒者近十年大小五六十戰未嘗敗北七十致仕又十年以壽終孫愈奎由武舉官南湖營都司

府志

郭椿字馥之南昌人原籍江甯康熙閒由將材任江西督標前營把總時三藩蠢動所在盜起椿奉檄勦樂安

戰於大嶺斬獲五千餘級授守備隨總督董衛國平賊
銅鼓營勦東瓜洞楊梅洲楓木嶺象頭山諸賊又隨勦
湖南克復武岡州鎮遠府衛諸城累功授福建海壇鎮
遊擊升澎湖協副將未之任卒

府志

何國雲進賢人康熙閒以將材隸福建金門隨總鎮陳
龍效前鋒身先矢石屢戰克捷勦撫臺灣澎湖海嶼有
功加左都督銜歷官至左翼漢軍副都統卒於官

府志

王猷定字于一南昌人時熙子以詩古文詞自負對客
講論每舉一事原原本本聽者心折書法亦擅名一時
所著有四照堂集

人物志

萬姓蘇豐城人登封知縣奉檄清丈除莊墜之額遺愛

無窮

白志

彭佑字承吉南昌人自少力田讀書年四十始有四方之志客粵東粵東方用兵佑閒關戎馬畫策多奇中諸大帥皆倚重之濟人之厄功成不居海寇犯肇慶制府強佑往招降至則露刃相向佑直入注視呼其名令解甲歸順蓋其人嘗居廣州爲眾所困佑救之且畀之金故一見屈服以功將題授監司力辭歸課諸子以明經孝友承先澤爲務葬四世十喪矜族親之貧者年九十

二卒

方苞撰墓志

李永昌字鳳山奉新人以把總守南豐閩賊攻城永昌同子名芳奮勇出戰斬四百餘級追至沙洲賊眾數千猝出衝擊名芳馬陷泥中遇害永昌戰益力弦絕矢盡猶手刃數十人自刎死事

聞贈永昌叅將名芳都司僉書予祭葬廕子弟一人

謝志

朱師聖字堯民進賢人事親盡孝戊子金聲桓叛兵至師聖解所著衣勸父暫避父出而師聖被執抗不屈膝

遂受刃眼光突出數尺聞者哀而壯之

安志 謝志 舊案安志孝義傳

尚有南昌喻以正李九漢秦文炎新
建熊登華程宗曾附錄姓名於此

熊鼎華字梅卿新建人順治初父文舉遠遊京師祖洪居里門爲有司拘縲幾斃鼎華出求代祖得無恙年僅二十卒於逮所巡撫張嘉以順孫具題奉

旌表府志

張應辰字三垣奉新人少孤依於叔父母叔無嗣歲時祭祀必涕泣致奠年未冠補縣諸生先爲邑宰黃虞再所知後黃爲學使調應辰曰吾知子而子不一來謁有

守士也以季子懋能貴贈文林郎應辰崇祀鄉賢懋能

自有傳

府志

裘琅字玉聲新建貢生宋濤熙進士萬頃後湛深經學尤邃於易工書母朱歿時年九十餘琅年亦六十號泣如孺子柩前有馴雉人以爲孝感所居雙江待以舉火者百餘家舉鄉飲大賓子君弼康熙進士刑科都給事

中

白志

傅宏烈字仲謀進賢人少負大略父應期明季爲粵西令宏烈隨任遂官滇黔尋自投歸照品調府同知升慶陽知府首發吳三桂逆謀謫戍廣西甲寅之亂復陷於賊宏烈密通款於

朝備陳賊可滅狀悉用其謀賊平卽軍中授廣西巡撫時

梧柳諸郡猶未下加撫蠻滅寇將軍使規取象林以討賊宏烈感激知遇拜表卽行辛酉兵次柳州投誠人復叛挾宏烈如賊營宏烈罵不絕口遂遇害贈兵部尙書

諡忠毅

安志

李明睿字太虛南昌人明天啟進士選庶吉士歷坊館罷閒六七年廷臣交薦用宮允起田閒時闖賊覆秦京師震動總憲李邦華密疏請太子監國南都備不測上疑不決明睿特請面對太子幼必上自出乃可有爲不用其策及寇逼范景文等重理前說不及事矣順治初爲禮部侍郎未幾以事去官卒年八十七所著有四部

稟

白志

甘文奎豐城人明天啟閒以選貢授南陵令改昭平擢

刑部主事順治初累官荆襄道以計禽賊首王魁等解京其黨深銜之乘攝事者莅任防少懈卽破城禽文奎極刑倡之降厲聲罵不屈死之事

閩贈光祿寺卿廕其子

府志

羅憲汶字植于南昌人明崇禎進士選庶吉士遭闕變被拷掠順治中爲祕書院檢討擢司業轉翰林院侍讀學士歷晉詹事以母老致仕歸養所著有漢柏居集

安志

朱徽字子美進賢人明崇禎進士歷官刑科給事順治元年以原官擢都給事乙酉請告南歸壬辰以年例外轉固原兵備副使致仕歸所著有測蠡草及耕道集

自志

劉宏祚南昌人明崇禎鄉舉知連平州順治四年內管營兵合城守把總賀炳倡亂宏祚力戰不克投南門方

井死

廣東通志

辜正湜字敏生南昌人明崇禎舉人性孝友讓產諸弟順治初任河南濟源知縣清滯獄闢荒蕪以勞瘁卒官貧不能殮士民賻助乃得持喪歸子光旦舉人

白志

熊一瀟字漢若南昌人康熙進士選庶常授御史在職十二年直聲播中外戊午典試江南所拔取多知名士宋衡楊大鶴並出其門尋擢太僕少卿順天府尹疏豁地租以甦民困舊時北閭號舍覆以片席一瀟出已貲易以瓦遂爲成例洊歷吏兵刑工四部侍郎肅銓政慎刑獄免逃人之株連清河工之積弊兩任工部尙書在朝四十餘年以病乞歸卒

賜祭葬著有浦雲堂詩文集並奏疏若干卷子大彬官行人本

進士官編修孫學熹舉人學烈進士戶部郎中

白志

夏以鋒字抑公新建人康熙進士官中書舍人以詩古文辭知名精醫術嘗奉

詔診視後宮輒奏效丁外艱歸里喪畢往來於江之南久之不

得意歿彭澤舟中孫之翰自有傳

府志

熊飛渭字漁濱南昌人康熙進士選融縣知縣值滇逆搆難孫延齡以桂林叛應之遣將駐兵東全以偏柳州分兵四掠飛渭獨開城門放老弱婦女人山留丁壯治守禦具賊不敢偏旣而賊陷柳州融城危甚賊聞令賢以僞官誘降飛渭佯許以緩其攻陰獎勵士卒守益固賊怒擊且急勢不能支融民勇健者遂擁飛渭出城奔山中集諸義勇以自衛己未夏聞大兵克復廣西開

道走桂林謁親王將軍時方有事滇黔融當孔道爲芻粟所取給趨令飛渭之官賊將范齊韓在慶遠馬寶在武岡招義將軍馬承蔭擁重兵駐柳州飛渭單車趨融招集流亡以蒐軍實未幾承蔭誘執傅將軍宏烈叛柳州州郡震驚奸民蘇際盛曾亞池鉤賊劫擄思管鎮鎮民竄至融融隘而兵寡飛渭請兵於府府不能援乃置牛酒集士民部署里甲分城以守人皆有固志賊不敢攻及事平以前城陷罷免粵撫郝浴留王桂林書院旋移主白鹿洞學者多所興起年七十卒孫直宋雍正進

士廣昌知縣

府志

李基字子厚豐城人學問淹博通河洛皇極星緯書蚤歲爲臨川章世純所賞康熙甲辰科易制藝爲策論基

邃於古爲文灝折有歐蘇風力遂成進士初授思州推官以母老固辭不就家居十餘載竭力孝養母卒終制改選河南嵩縣尹嵩苦流賊餘孽潛伏菁莽閒數出爲民害前尹畏避不敢發基之官偕營守領兵往捕獲二十餘人置之法餘黨遣散予以生業盜頓息嵩人德之立祠以祀未一年以疾告歸子銓雯歷任新淦永豐教諭九江府教授所至多所成就

府志縣志

姚健字天行南昌人康熙鄉舉任西鄉知縣比抵邑前令五人以交代羈累健曰此矜人也亟清釐受代五人者感泣去總督某以大獄三令讞數日而決民服其明訟獄寢息會西安大侵撥餉濟軍食募民挽運健以民困狀告上官減他邑之半胥役舞文者置之法追其贓

私以補糧之無王者先是吳三桂叛襍派繁興西鄉積
逋累萬限年帶徵健具情詳豁民慶更生捐俸修金洋
堰今利賴焉以勞疾卒輓歸士民哭祭者數萬人子修
哲崇義訓導府志

丁蕙豐城人父文達以孝友厚德著稱蕙亦至孝父病
刺血和藥以進投徒於外中夜歸恐叩門驚母輒露坐
達旦康熙進士改庶吉士累官福建學道登萊副使家
居捐貲挑濬沙湖修邑郭大岸渡河西之蘆花港鄉人

德之

崇祀錄

萬任字亦尹新建人康熙進士知甯晉縣事民苦車役
富以賄脫貧者累焉任察其弊均之旋以事落職歸耽
情著述矻矻不倦巡撫宋犖敬禮之府志

饒然生字天然進賢人恩貢生提學道楊兆魯素風厲然生往謁問曰江西有與若同名者乎然生曰不知也楊爲誦饒然生文字乃應曰此某少作也楊瞿然敬之呼以先生

府志

張泰來字扶長新建籍豐城人康熙進士官金鄉知縣愛民造士稱山左第一分校鄉闈得孫勣爲解首行取吏部主事外轉廣東兵備道年老乞休子孫遂入籍新

建

府志

熊士伯字西牧南昌人康熙拔貢生以南康教授擢知陝西高陵縣清灘田減鹽丁民皆德之歲苦旱士伯循鄭白渠故迹捐金修復水乃通以勞卒官

府志

李芳梅字又白南昌人康熙鄉舉謁選得陝西鳳縣鳳

故疲敝又當蜀孔道時西陲兵興羽檄不絕人爲之危
芳梅曰人盡擇善地誰任其難者卽日就道與民更始
政治一新性剛介有旗員某使蜀家奴前驅橫索不法
芳梅詣公廨叱曰若橫暴至此如國法何奴驚伏翼日
旗員至芳梅具以聞乃扑其奴以謝川督年羹堯過鳳
怒供具不豐欲奪其印去芳梅笑而聽之卒爲羹堯所

中罷官歸

府志

蔡秉公字去私南昌人康熙進士知遂平縣縣素殘破
秉公勸墾荒築河隄禁強暴置義學以計獲盜魁佟二
及其黨邑大治五年擢吏部主事遷員外郎部有老吏
貪猾秉公廉得其狀戍之邊尙書陳廷敬以能聞

特賜宸翰戊子典貴州試旋外轉台州府知府時海寇蔡元亮

嘯聚萬人勢張甚秉公乘賊宴重午勒兵禽之釋其無辜者二百七十人太平縣民變單騎往定之踰年以勞得疾致仕歸初秉公爲諸生貧甚與族人分屋居屋已敗雨漏溼秉公持蓋於室且行且讀婦告二日不炊秉公笑曰吾歌以佐汝當忘飢遂抗聲而歌及爲吏部郎爭選議振沈滯選人德之餽千金峻卻之後從貴州還宿逆旅一男子負赤劊投秉公前叩頭去追還之男子馳而呼曰吾卽餽金人所遣也秉公卒委劊去年七十卒子正笏乾隆進士博綜經史不仕

府志
縣志

裘君宏字任遠新建人性聰慧年十二補邑諸生康熙順天舉人補教習嘗游學白鹿洞院長湯來賀贈詩云子歸應勉旃竹齋重接武竹齋者裘萬頃別字也君宏

篤志好學搜輯甚富皆手自編纂子聯桂舉人朝邑知

縣

府志

曹家甲字爲質新建人康熙進士性剛毅任福建龍溪知縣不肯俯仰上官督府以特才劾之去性敦孝友潛心經史尤精形家言足迹半天下舒眺名勝識解益超著地理原本四卷

聖

祖仁皇帝特召相視蒙古地形時欽天監監副員缺理藩院

將奏官之以老病辭歸年六十九卒

朱載撰墓誌銘

支溫邑字叔鼎進賢人嘗從父學於桐城先達奇之有國士目康熙進士觀政三月而歸閉戶讀書爲古文宗法先秦兩漢詩至王孟與兄元昌相倡和選廣東恩平知縣以疾卒於京

府志

鍾先烈字于祐南昌人康熙副貢才名噪都下朝貴將薦之先烈以親老辭作詩寄兄有朔漠風沙人面老燕臺歲月宦情疏之句

府志

彭廷謨字夏賡南昌人與弟廷訓師事同邑劉廷獻廷獻工詩有經濟才終鑲紅旗教習廷謨康熙鄉舉會試不第客兩江總督幕府策其必以賄敗謝去四川布政使孔毓珣重幣聘之往乃變姓名爲陳大彭蜀以西藏用兵軍需冊籍糾互不可理廷謨緝閱十晝夜得其端緒爲代成奏稿萬餘言總督年羹堯見而奇之問毓珣誰爲草此毓珣以所易姓名對請相見廷謨謝曰吾所以變姓名者防年公耳年公才勝於德吾不欲與其難請言其人草野倨侮不願見貴人會廷訓督學山西遣

使返之因并辭孔去後孔爲廣督復來迎謝不往卒年

六十五

府志
縣志

彭廷訓字尹作廷謨弟康熙進士改庶吉士散館授編修歷遷右春坊右贊善少與兄廷典廷謨弟廷誥號江西四彭旣通籍益以文章自任壬辰分校禮闈得士王澍顧嗣立林佶皆一時之選校理宋儒熊剛大編注性理近思錄以書法受

上知入直旋以憂歸服闋補原官教習庶吉士考課詳慎遠方寒素之士輒飲助之典試山東所得士致通顯者十餘人視學山西高平孝子李東家素貧父客死瓊州東繭足萬里航海負其骨以歸廷訓具疏以聞表其門旋以薦充明史纂修官致仕卒以子元瑞貴贈光祿大夫

府志

張懋能字職在奉新人康熙進士

御試稱

上意有佳士之目改庶吉士授翰林院檢討纂修

國史及政治典訓物類廣義諸書六載告成丁酉爲浙江
鄉試副考官既反命科場弊發比會質得舉子交通狀
皆同奉使者所爲懋能坐失察改國子博士遷行人司
卒年五十一子星景舉博學鴻詞科乾隆進士官知縣

府志

涂基字鞏垣靖安人少孤力學康熙鄉舉南康教諭調
弋陽卓異保題授廣東南海知縣粵東饒財賦風俗豪
華沿海復多盜甚至嚴保甲謹關防條議民間吉凶諸
禮不得逾制各澳漁船編號朝出暮歸無令遊奕海壖

肅清每歲冬春交設粥廠賑窮民生全者以數千計邑
田廬當低窪受水患處爲之築隄捍衛旁鑿支流以資
蓄洩民賴以安至今稱涂公隄

府志

帥我字備皆奉新人承發子與父共知名稱大小帥我
幼有至性父得危疾嘗焚香告天願以身代夜夢神語
曰胡不食松節旣寤檢醫書與舊方合一服而瘥讀書
日恆萬言父憐而節之我蘊火伺父寢讀至子夜率以
爲常弱冠淹通羣籍工書善繪尤精於醫時南昌黎元
寬進賢饒宇枳負重望見我詩文咸擊節嘆賞我益自
刻勵與進賢齊之千輩爲詩文社交相切劘名益振甲
寅邑有寇警我夜負母走匿山谷中猝遇賊露刃相偪
我以身翼母爲賊陳說忠義辭氣慷慨賊相顧嘆曰孝

子也委之而去年三十爲諸生試輒冠其曹商邱宋輩
撫江右合十三郡人士試詩古文詞錄第一甚禮異之
晚舉順天鄉試出趙司農申喬門趙風裁嚴峻獨深器
我嘗語人曰吾不喜王京兆喜得帥生耳居京師三年
考取內閣中書僦居一小寺杜門屏迹輦下名公卿致
之不能得壬辰與禮部試有貴人招飲酒半屏人語稍
及私我正色拒之退謂所親曰吾爲諸生恥奔競豈髦
而失節邪雍正元年巡撫白潢將以孝廉方正薦我三
辭乃已年七十八卒祀鄉賢

府志

徐啟統字垂昆豐城人父斌康熙鄉舉官廣東新興令
有廉惠聲啟統姿性聰穎學問淹洽爲文獨矯時弊有
起衰式靡之目康熙戊子以拔貢領鄉薦壬辰成進士

留京觀政奉

特旨召試與修

御選唐詩并禮記月令廣義書成授中書以母喪歸哀毀致疾

卒

府志

萬承蒼字字兆南昌人康熙進士改翰林院庶吉士散館授編修充

日講起居注官掌

制誥明習典故編輯諸書屬稿多出其手居詞館三十年不遷經

御試列上等擢翰林侍讀學士先後充會試同考官主試粵閩

生平寡交游惟臨川李紱桐城方苞過從最密

府志

甘汝來字耕道奉新人康熙進士官涑水知縣下車罷

民雜派銀六千兩涑水多旗莊細民賴佃以生汝來約無故不得更改佃戶故事有司不咎旗人汝來請於上官許以柳木杖杖之畢里克者侍衛之調鷹差遣者也至涑強踞民居毆民幾斃汝來趣令縛之繫其家僮於獄其黨以擅拘職官入告下吏兵刑三部會獄汝來抗詞不屈部議革職

上察其直還原官以強項名震天下調新安再攝雄縣疏白楊淀河溉田數千頃行取吏部文選司主事出知廣西太平府攝南甯府事擢左江分巡道廣西按察使一歲四遷至廣西巡撫在郡罷斥龍州土司爲左江時定思明土州及安南祿州地界議上皆從之入爲左副都御史以土官岑映宸事仍署廣西巡撫先後禽莫東旺羅文

剛等皆兵不血刃卒映宸東身歸罪事定還都旋星吏議罷總裁咸安宮踰年起爲霸昌道調蘇松糧道擢廣東布政使陳椎關藏匿則例之弊請以沙坦地予民耕種仍緩其催科藩庫有羨餘二十餘萬兩奏歸公入爲禮部侍郎讞獄大同奏復先儒吳澄從祀皆如議行

高宗登極擢兵部尙書轉吏部仍兼兵部定侍衛推用法及文員雜職闕白銓敘旋晉太子少保典會試充

世宗憲皇帝實錄館八旗通志館纂修三禮館總裁以疾卒年五十六

上聞震悼輟朝一日遣官經紀其喪

賜白金千兩予祭葬諡莊恪

附志

曹淇字瞻泉新建人康熙鄉舉中書舍人幼資鈍稍長

方嚮學攻苦異常始有得自星占律呂醫卜絲竹之事咸寓意焉弗以名也肆力宋儒之書通達交與著正誼齋詩文精微雅潔漳浦侍郎蔡世遠見之亟語大學士朱軾侍郎李紱曰江右多才又得一个焉吾友魚門之言猶信魚門者副都御史鄭任鑰也淇分校浙閩閱試策凡援據隱僻淇獨悉之淹博聞都下

府志

譚旭字東白新建人康熙副貢官教習授瀘溪教諭究心程朱之學著述有宗旨

府志

龔木字東野南昌人有詩名與八大山人僧心壁翠世珏蔡秉公友善按察使孫蘭敬禮之嘗教學九江府月夜失木所在旬日歸詢之則乘月遊廬山出袖中詩數十幅皆奇肆可喜又善擊鼓或乘醉至人家索鼓擊之

音節悲涼盡意乃止貴顯者欲聞之乃不可得辜世珏
貧而工詩性嗜酒孫蘭去無所依病卒

府志

齊之千字仲英進賢人工古文詞學使邵吳遠工衡鑒
嘗曰吾門有兩奇士韓莢與之千耳時文齊不如韓古
文韓不如齊巡撫董衛國舉博學鴻詞以母老不赴貴
人走書幣乞文非其人不作招之不往以諸生終

府志

劉良玉南昌人能詩王士禎詩韓詩已掛朝冠去吳綺
仍聞貫索來兼使南昌消息斷燕城懷抱幾時開自注

良玉字小石舉人官兵部郎中

府志

劉健字汝嘉崑子縣學生博學能文嘗述崑陷賊事曰
庭聞錄載吳逆始末頗詳健遊四方所至輒考其志乘

事關南昌者卽書之曰梓材集

府志

龔炳字虎臣新建籍南昌人康熙武進士授侍衛補浙江守備雍正乙卯浙匪富秀山有黨王林官等八人竄匿江西上官以炳本籍檄令密緝林官挾妖術炳以法厭勝卒獲之以功擢遊擊炳能詩善飲酒有儒將風杭州鎮海樓額炳書也以老致仕歸

府志

曹繩彬字右宋新建人歲貢生幼有奇慧屢困鄉試讀書益力家素貧樵蘇耕漁皆身任之既足衣食餘以周人不能償者則焚其券偕弟洪應鄉試洪暴病負之出巡撫卽廷極止之顧語屬吏曰此亦人閒兄弟也可多得乎居母喪期年省墓哭泣不輟竟以哀毀卒祁陽陳大受銘其墓曰貪己者生慕親者死不有醇儒疇爲孝子弟繩植七歲籍諸生困場屋二十餘年益奮勵與湯

永寬齊之千梁機彭廷謨兄弟切劘爲古文詞戊子鄉試臨川李紱同號舍見其文曰解首屬子矣榜發紱領解繩植第三又二年遽卒

府志

周萬達字蒙泉新建人雍正鄉舉少孤事母孝悲愉忻戚惟母是視與諸兄無閒言爲諸生數十年言規行矩人敬憚之嘗酌儀禮涑水家儀紫陽家禮與今世相宜者行之家庭型於鄉里雅耽經史毫學不倦以子學健貴封如其官

謝志

喻指字非指新建人祖致和祀理學名賢祠指雍正歲貢生築室西枝邨讀書其中崇尚正學排斥異端博采古人輔正黜邪諸說爲闢異叢言輯西山志遺文逸士多賴以傳年八十二卒

府志

周學健字力堂新建人少有文譽與奉新帥念祖相埒
雍正進士授編修歷遷刑部右侍郎出案山東私票鹽
價滕令李鰥諱盜曲阜令孔毓琚營私枉法復奏稱

旨再奉

命會上下兩江督撫辦災賑水利權福建巡撫疏復督撫將軍
標兵會操賞銀尋權浙閩總督加太子太保銜疏請臺
灣餘粟任民轉運從之旋授江南河道總督緣事獲譴
發直隸城工效力復以江西巡撫開泰奏劾

賜自盡學健工衡鑒有幹略嘗任福建學政閩人悅服稱周夫

子撫閩時除夕出精兵千二百人勦烏龍江匪巨愍殄

平一洗積害閩人德之

府志

劉吳龍字紹聞南昌人雍正進士由庶吉士授吏部主

事時銓政積久弊滋吳龍殫心釐剔謁選者一振沈滯
厯遷御史給事仍兼攝選司事凡十年轉光祿寺少卿
擢安徽按察使視獄牘有以欲劫道船科罪者連繫滿
囹圄吳龍曰豈有欲劫二字可置人於死立釋之遷光
祿卿管理北路軍糈先是有牙人應官領帑承應繼而
侵蝕虧耗日有逃亡貽累於領銀諸散戶至鬻妻子以
償吳龍諗其故奏請豁免尋視順天學政再視學江南
厯遷左都御史厯陳州縣自理訟詞顛倒是非小民無
所伸訴宜令督撫另委監司按行稽察以通民隱革步
軍統領白役擾民請修築江南寶山通州一帶海塘以
捍潮汛減京口運河民賦使盡力挑濬以利漕艘嚴禁
水陸汛兵毋任廢弛以絕盜源論事侃侃洞達幽隱壬

戊充會試總裁以勞瘁成疾卒年五十三

詔賜祭葬諡清愨祀鄉賢祠

府志縣志

帥念祖字宗德帥我子雍正進士用知縣

世宗以念祖氣度不同准大臣保奏別試於是朱軾黃叔琳史

貽直李紱皆具疏保試所樂在人和詩稱

旨以庶吉士用試日

頒賜筆硯皆異數也散館授編修與修一統志改御史遷給事

中視學浙江所拔皆知名士乾隆元年奉

詔保舉博學鴻詞念祖所舉杭世駿齊召南周玉章諸人並極

人才之盛念祖工詩善指畫指畫始於鐵嶺高其佩念

祖繼之並有名出爲分巡大名道遷西安布政使護理

巡撫緣事謫軍臺卒於戍所

府志縣志

朱鳳英字颺羽南昌人雍正進士由庶吉士授編修改
御史典試湖南擢雲南迤西道所屬鄧川州數被水鳳
英度打磨坪馬鞍山地勢捐俸疏鑿遂得安流以資灌
漑耿馬上司罕國楷爲所部七目所逐奔告總督議以
兵往鳳英持不可輕騎馳至居館署七目陰謀焚之夜
半火作忽大雨如注火盡滅羣酋駭散乃開誠宣諭威
德予以自新七目咸伏聽命願復歸土司以親老乞養
歸不復出

府志

齊以禮字汴子進賢人雍正鄉舉天性孝友一日讀論
語悟曰向者幾爲舉業誤反之於身文在是矣年四十
依父母不忍離同產姊三人異母弟四人親愛無間長
姊歿二十餘年甥至猶對之泣下居喪不作佛事寢食

喪次朝夕奠必哭近宅有池可漁有地可種植則公之
於眾山田苦水涸出貲築隄數十丈鄉黨賴焉家無餘
貲爲善益力以大學士朱軾薦授都昌教諭莅任五月

卒

府志

劉斯組字錫佩新建人潛心經術尤深於易雍正鄉舉
以明通榜授分宜教諭時粵東奏擇江西教職中賢能
者府置一員課士斯組檄考第一分屬肇慶兼主端溪
書院乾隆丙辰左都御史孫嘉淦光祿寺卿劉吳龍薦
舉博學鴻詞己未仍中明通榜知廣東西甯縣多善政
甘棠書院久廢捐貲助膏火及致仕邑人立位祀焉旋
主嶽麓書院學者稱斗田先生子侑謙先後成進士皆
以文名能世其學

府志
後錄
稿

甘禾字周書汝來長子康熙鄉舉與祖顯祖叔汝逢同榜年甫十八禾研窮經史隨父官京師以順天府尹陳守創薦舉應博學鴻詞科後官兵部車駕司主事初入司辦臺員欠帑同官以意出入禾白於尙書持平定議直省郵政經費出納吏胥率以咨駁舞弊禾悉除之再補武庫司主事監督太平倉年六十三以疾卒官禾顏居室曰愛廬學者稱愛廬先生

府志

舒慕芬字蘭軒靖安人與弟慕芳齊名廩貢生南豐教諭雍正五年舉孝廉方正授江南奉賢知縣興學校勸農桑清鹽法在官三年乞養歸

府志

曹茂先字兩華新建人繩彬長子年十二能古文雍正拔貢生歷知鳳臺陵川虞鄉安邑縣事補交城知縣以

郡守揭藩司株連擬戍會赦免乾隆元年起原官旋引疾歸名其居曰見一山房錯列圖史偕弟昌言發先振先經先秀先自爲師友晚號天山遜翁以世居桃花鄉又自號桃花鄉人卒年六十七居官多實政虞鄉從元代併歸臨晉雍正六年復建虞鄉城池壇廟基址久被侵占糧賦難詰茂先爲經畫報墾以補額徵安邑有鹽池小民或肩負升斗覓食上官嚴懲之茂先力請乃已交城產良馬小而善走民坐是苦科派茂先爲革其弊

府志
縣志

甘紱字馭麟

縣志作
取麟

豐城人雍正閒拔貢生淹貫六籍

倡學一方巡撫陳宏謀列其名旌善亭中乾隆十七年應聘修縣志屬詞修潔年八十三卒子仁溥仁洪俱文

學士

府志

熊學鵬字雲亭本子雍正進士授刑部主事轉員外郎中遷山西道御史巡視臺灣郡方苦旱學鵬至既具奏荒歲民困狀卽開倉賑恤

恩命未下緩征平糶次第畢舉番民若勿知有災者故事巡臺兼學政例嚴錄科臺郡鄉試額中二名時應試者已得五百餘人學鵬請免拘成例示鼓勵又以會試中額逾十名始得請臺郡厯五科僅得十人中有不得與計偕者請另編號酌取郡中私渡有禁學鵬定以內地民人有恆產者給照予渡又奏新墾田依內地升科皆從之厯官太常寺少卿太僕寺卿以奏派查馬落職起補光祿寺卿授順天府尹擢內閣學士轉禮部兵部侍郎充

會試知貢舉御史有以磨勘不實爲言者

特命覆勘有公正大臣之

裒補廣西巡撫廣西鹽由官運當事奏改商辦學鵬議以絕私
販無更制旋調浙江值浙水災學鵬親歷災地督州縣
按戶以賑臨海被風潮災尤重學鵬力籌撫恤活人口
七萬三千餘修房舍一萬八千餘請弛溫台海口米穀
之禁以裕民食得

旨俞允賜浙水風清額學鵬父編修本亦

賜祿養延祺額學鵬凡兩官浙江巡撫再調廣西上林獐民陸
李能聚眾不法學鵬飭員弁案捕論如律

上嘉其迅速交部議敘復調廣東以廣西舊案落職復
命往四川軍營辦奏銷事竣回京以足疾乞休

賞三品銜府志

袁守定字叔論豐城人雍正進士官會同知縣縣屬洪江爲辰沅大鎮守定至革洪江三弊曰牛稅曰小甲曰銀工鎮多火勸民自爲火巷火患少息民大悅服屬古州苗叛請於上官創鄉團修峯塹以備寇時守定奉母之官以兵事起請母避省垣母謂守定苗來爾能死我豈苟生者守定益感奮效忠未幾亂定四境無事縣有秣穰庵與城隍廟近庵被火主僧復智爲人殺以盜報守定庭鞠僧徒皆戰悸不能言城隍廟有二僧者代言盜守定疑之察廟中神龕上有異令役視之則二僧之衣米藏焉復鞠二僧及僧徒則皆同謀者以復智有藏資殺之既搜所藏無有乃縱火掩之也於是盡論如法

調芷江權桂陽州鄉有古井煙直上水驟沸守定經其地見之令竭井得屍密偵之蓋匠人竊於某肆而逃主人追殺之投屍於此也執訊之盡服其決獄類此政聲大起督撫交章薦全楚賢能第一會以憂去再起補山周知縣遷禮部主事病歸卒

府志

曹繩柱字介巖家甲季子雍正進士授刑部主事兩爲提牢凡情可矜者輒請末減擢員外郎有遺犯將發解繩柱覺有異鞠之果贖以替代者捕真犯寘之法擢湖廣道監察御史乾隆元年出爲浙江甯紹台道調杭嘉湖道以憂歸起補湖北驛鹽道武昌金沙洲患水決田久不治繩柱築隄捍水乃成膏腴旋改河南南汝光道升福建按察使閩俗殺人者購人代罪名曰頂凶繩柱

奏請嚴定科條以正其罪臺灣境居海外凡大獄議由

道臣定訊均如請遂爲成法擢福建布政使卒

府志

夏之翰字知畏新建人父熙澤進士官廣東知縣有政績之翰雍正鄉舉學行醇篤乾隆丙辰以光祿寺卿劉吳龍薦應博學鴻詞科報罷惠郡王延爲上客屢試禮部不第借補湖南布政司庫大使旋告歸之翰學無所不窺古詩醇雅有真意雜著原本經術不事塗澤旣而肆力於濂洛關閩之學一言一動以古人爲法旣歿

文達曰修銘其墓

府志

劉顯祖字穎宏義甯州人淵通經史雍正鄉舉公車五上不第著有北游紀程築室鳳山之麓曰萬松書屋銘

山蔣士銓嘗稱其文若蘇明允詩若杜少陵

府志

陶萬達字兼善新建人雍正鄉舉性至孝母病乳萬達以口吮血而愈官甘肅成縣知縣積案八百餘事萬達莅官日治十事三月而畢縣額輸屯糧地近川蜀民苦轉運爲詳請改折邑稱便擢吏部主事遷貴州松桃同知地爲苗民雜處諭以理義繩以法度夷俗漸化興立義學以教文字歲科兩試請增學額一名松桃苗民之有科目自萬達始累遷至知陳州府郡人爲置秀峯講堂歲時講學卒於官祀鄉賢

府志

毛宇衡字紫玖豐城人歲貢生工書博極羣籍通申韓家言以貧出遊四方先後佐湖廣廣東巡撫幕興利除害隱贊治理粵撫嘗語屬吏毛先生陰德半天下子鳳雛進士官知縣贈宇衡如其官

府志

裘思芹字魯青新建人邑諸生事繼母孝友愛諸弟待族鄰親串並有恩禮一時相推重薦授浙江歸安知縣德意化導訟獄衰息歸安財賦甲浙西歲徵不下二士萬思芹不事敲扑里無追呼民困積逋開代輸之雍正壬子秋大雨雹傷禾稼請發帑以賑就鄉鎮設粥廠全活無算上官方舉卓異疾作遽歿聞者惜之

府志

楊自唐字翊清四川天全宣慰使雍正間以事罷職奉旨徙居南昌賜田一頃宅一區自唐在天全時從征西壩充先

鋒奪火草坪積有邊功及遷南昌唯以耕讀課子孫絕

口不談邊事年七十卒

府志 謹案自唐父子府志俱列寓賢攷自唐奉

旨徙

南昌當爲著籍今改正

楊大業字藏用自唐長子在蜀以詩文鳴又習劉綰袖

箭及徐達賈刀法邊人畏之及居南昌與弟振業縱情詩酒遨遊山水閒自號花洲漁隱嘗過劉綬故宅語其子曰昔吾在天全嘗夜坐刺客猝至吾出袖箭中之卽將軍法也大業征西廬運糧有功襲宣慰使振業字玉德以功授天全都司

府志

盛際斯字成十武甯人諸生性孝友少日避亂山中晝涉溪澗擷蔬果奉親夜從伯兄授周易母病月餘衣不解帶母不食亦不食母飲粥始飲粥亂定讀書玉清宮窮經史百家刻苦忘寢食遊京師不遇以選貢授樂平教諭與諸生講學嘗曰四子六經不出日用舍親義序別無學也有不率者委曲開諭往往引咎自責人皆感興後遷吉安府教授致仕歸年七十卒子謨鏡樂自有

傳

府志

余文梓字季良武甯人少孤貧母王教以經書深自刻厲閉戶累歲學乃大就由歲貢選萍鄉訓導期年乞休歸初潭埠瀕河夜半水大至眾悲號徹天文梓編桴率子弟家僮往救全活凡數百人子騰蛟以兵部尙書甘汝來薦舉博學鴻詞上書力辭後中進士官刑部主事
呈吏議歸孫世蘇舉人

府志

江西通志卷一百三十九

江西通志卷一百四十

列傳七 南昌府七

國朝

葉一棟字廷幹新建人乾隆進士改庶吉士授檢討歷官至內閣學士嘗典試江南榜發得士薛觀光顧我鈞諸人皆一時名宿旋授順天學政遭父喪歸服闋補左副都御史未幾註吏議去旋加鴻臚寺卿銜母老

御賞慈臺延祺額居家四十餘年每集同里子弟能文者課於

慈臺堂引繩削墨啟迪不遺

府志

淩之調字廣心新建人年近五十始舉乾隆進士授工部屯田司主事侍郎索柱張廷瑑並以御史薦乞養親歸未幾卒之調夙有文譽官工部以通政使趙之垣薦

應博學鴻詞科報罷時論比諸唐順之在刑部爲外翰

林云

府志

涂錫禧字迎昌奉新人乾隆進士官刑部主事讞獄山

東賑卹江南稱廉明纂修律例斟酌平允累擢本部郎

中總辦秋審秩滿以疾告歸

府志

曹秀先字冰持新建人少能文日成十餘藝長者皆歎

警敏年十二失明有道士踵門按摩之而愈戶部侍郎

李紱薦舉博學鴻詞以先成進士改庶吉士遂不與試

散館授編修累官吏戶工三部侍郎特晉禮部尚書充

經筵講官秀先天才贍博問學該明通籍後益求有用之學

鴻文鉅製推重一時侍直

內廷

上諭曹秀先讀書人甚有學問及扈從

時巡歷典試事祭告海嶽讞獄浙江

恩遇之隆近所罕覲長禮部時謹守成憲深戒更張其在浙江
特陳請濬茗南上下湖以備旱澇浙民至今猶感其德
先是秀先任御史假歸邑有魯江田千頃苦水患自秀
先祖已置洪建牖至是秀先又開別港引大港水注入
洲窪續建牖於茶塘以時啟閉捐俸錢建宗祠祠成
上賜秩宗衍慶額通籍五十年家無餘貲老屋數椽薄田數畝
罔有增益年七十五卒於官贈太子太傅

賜諡文恪予祭葬

府志 縣志
鶴徵 後錄

趙開元字希恪奉新人乾隆進士知河南湯陰縣調新
鄉歲饑救荒實心籌畫捐建鄘南書院以課士再調武

陟地當沁衝固隄防息水患累官刑部郎中總司秋讞
寬嚴中理選雲南楚雄知府以年老留部尋告歸築室
城北購書萬卷涵泳其中

府志

帥家相字伯子奉新人我之孫七歲解聲詩弱冠名譽
益起乾隆進士改庶常充授時通考纂修官分校明史
散館授吏部文選司主事出知廣德州值州境荒請發
帑按戶賑恤民獲大甦州有潢水塘澄濁視州牧賢否
自宋范仲淹治郡後至是始再澄焉厯知蔚州深州擢
知廣西潯州府一年左遷赴都謁選以疾卒

府志

裘曰修字叔度新建人父君弼以進士知建德縣有善
政曰修爲諸生時順天府尹陳守創薦舉博學鴻詞旋
成進士由庶常授編修累官至吏部侍郎充

經筵講官調戶部侍郎緣事落職再起左春坊左中允轉翰林院侍讀復授吏部侍郎軍機處行走

賜第宣武門內時曰修繼母郝年八十生母王年七十特

賜八旬衍慶七袞連祺額榮遇優渥曰修明敏自然神解超絕論列艱鉅判決如流值伊犁用兵嘗面奉機務

賜紅絨結頂冠御衣乘傳至巴里坤宣

聖諭會逆酋莽阿里克遣弟僞稱押送諸番謀窺卡倫曰修執付總督發其奸時哈密兵少有赴巴里坤種地軍七百人請留爲衛撥沙州五衛屯糧添備支發以其餘分汛站平糶奉使河南塞陽橋蠶口二百餘丈又開幹支河道六十有七袤五十餘萬丈延三千餘里凡賈魯河惠濟河渦河豐樂河皆受治又於山東疏伊家河於安徽

疏浚宋陽十家武家及霍邱城西諸河於直隸治永定河北運河於

京師復大通橋至東水關河六千餘丈建牐置壩皆百五十丈

上賜詩褒寵有馳驛召來京斯實爲民基語權倉場侍郎順天府尹擢禮部尚書調刑部降補府尹再轉工部侍郎晉尚書充

四庫館總裁加太子少傅與纂西清古鑑祕殿珠林石渠寶笈錢錄諸書

上嘗以曰修書法類宋臣張卽之出內府所藏卽之寫華嚴經殘本

命之補書曰修先後奔走足迹半天下凡五掌文衡八勘水利

歷官六部侍直樞廷計議密勿無苛無縱立朝侃直無所隱雖屢以忤

旨切責不逾時

寒林詩

恩禮有加及以噎病疏請解職

上眷念甚深特遣御醫侍衛前往問視復

賜詩曰腹因廢食減便便何事投醫未霍然欲乞水衡權解職

可忘芸席共研篇卿云效力正長日我則憐才未老年
不忍養疴例香樹還希香樹例全痊以乾隆三十八年
五月朔卒於官

上聞悼惜遣大臣奠茶酒

賜諡文達予祭葬祀郡賢祠二廉不償自有傳

才傳 府志 鶴徵後錄

盛謨字斗挹際斯子性狷介爲身體力行之學不諧流

俗武甯之俗喪事喜用僧巫謨力排之以朱子家禮爲法閭里積習爲之一變與弟鏡樂討論一堂築樓以居曰字雲巢分宜林有席嘗致書稱字雲先生講學一日卽爲學者一日典型謨亦以師道自任語言嘖笑不苟人皆憚之從遊多名下士按察使黃岳牧以經學薦辭不赴官安義訓導課士以讀書立品爲先

府志

盛鏡字于明謨弟父督課嚴兄弟益力於學與人惟講求保性真行素位時仲兄謨季弟樂名滿天下高士多造廬詩文酬唱各盡所長偶得鏡言則羣相帖服有和阮詩百首鉛山蔣士銓甚雅重之子牧字遠皋文思超邁頃刻千言乾隆庚寅鄉舉

府志

盛樂字水賓幼奇慧四歲能辨四聲七歲能詩十一歲

通經史諸子百家與兄謨鏡並以詩文著稱人稱三盛
乾隆元年禮部侍郎王紘薦舉博學鴻詞報罷當路欲
留之以母老辭歸初樂受知於甘尚書汝來李侍郎紱
都門目爲學者所善天門唐建中烏程沈澗維揚江昱
江恂廣信蔣垣蔣士銓盱江趙由儀饒學曙潘從龍陶
其慤同郡夏之翰劉謙皆一時之選年四十三卒從子
樵字雲子工詩文未冠而天樂甚傷之門人最著者汪

軻楊屋

府志

尚廷楓字嶽師新建人原籍陝西興安以父濬官浙江
提督廕戶部山西司主事乾隆己未開博學鴻詞科臨
川李紱言於副都御史孫國璽列薦廷楓曠世逸才經
史諸子博涉旁通在京師日與浙江萬光泰袁枚有三

異人之目

府志 徵後錄 鶴

饒允坡字又蘇進賢人拔貢生以福建學政周學繼薦
應博學鴻詞科爲人慷慨重然諾吏部尚書楊錫紱嘗
爲之傳署其尾曰知汝不能薦羞稱獻納臣其爲時引
重如此

府志

曹經字原山新建人性敏悟務學嗜讀漢魏書乾隆己
未會試總裁以第四名進呈

上特改第二由庶吉士授編修侍直應

制賦秋日懸清光詩人相傳誦與冥

瀛臺分賦柏梁體詩復恭和

御製詩有直向秋風寫春意樓船汾水不同歌句時嘆爲莫及

卒於官

府志

涂逢震字驚百南昌人雍正鄉舉以內閣中書直軍機房乾隆己未一甲第二名及第

國朝江西鼎甲自逢震始授編修歷升左中允癸亥甲子江淮水災逢震充宣諭化導使徧勘災邑宣布

上德民心翕然累遷工部左侍郎條注則例吏胥不能緣以爲

奸旋以事失察落職起補光祿少卿再遷至通政使乞

假歸卒

府志
縣志

李湖字又川南昌人先世居南豐乾隆進士官山東武城知縣調郟城遷甯海知州

高宗東巡

召對稱

旨擢泰安知府調知直隸大名復調保定府宣化縣民以令貪

南昌府志
卷之二十一
暴入都具訴事下總督方觀承觀承檄湖往鞫訊湖請
黜令總督不可湖力爭久之長揖出曰可以去矣趣家
人假裝將引疾總督夙知湖賢從其請薦擢通永道調
清河道遷直隸按察使江蘇布政使上疏言社倉三事
尋擢貴州巡撫貴東道龔學海素勤幹爲忌者所劾湖
疏請乞留得

旨允行又奏貴州官吏輾轉更署官非本任則無恆心職可屢
遷則懷倖志非實人地相宜不當輕率調遣復列詢羣
吏令各爲答以覘賢否歷陳徵給兵米不當以一二流
弊改舊例條具鉛運章程旋調撫雲南復奏銅務十條
請酌減雲龍草溪兩井額鹽加威遠等州縣鹽價藉補
薪課皆下部議行會以容隱總督彰寶貪婪落職

府志

熊爲霖字浣青新建人乾隆進士由庶吉士授檢討充

日講起居注官應

制和詩受

上賞纂修

國史升侍讀再應

詔試策論

御筆擢第一典貴州陝西鄉試充順天鄉試同考官爲霖生有

夙慧幼爲文卽卓然名家於經史靡不貫串尤工金石

篆刻

府志

汪軻字輦雲武甯人工詩初落魄無所知名獨與新建熊爲霖相友善會南昌守吳同仁見其詩亟稱之督學

金德瑛亦致推敬由是聲名藉甚與南昌楊屋南豐趙由儀鉛山蔣士銓稱江西四子一時才流無不傾倒以貢生授吉水司訓卒

府志

周孔從字監二義甯州人四歲有神童之目雍正元年流匪王本習煽亂州人皇遽奔匿孔從誦讀自若十五補弟子員父母相繼歿養祖母撫諸弟咸竭心力會除夕不戒於火孔從突火負祖母曳諸弟以出家遂蕩然爲學益力乾隆六年舉於鄉明年成進士改庶吉士九年順天鄉試

特旨命庶常分校孔從與焉所得士皆知名十年授職檢討孔從讀書中祕爲文章詩歌臻古人堂奧詞館咸致推敬學士金甡嘆爲天才年三十五遽卒子學山舉人入都

試禮部士大夫羣相謂白亭有後白亭者孔從別字也

府志
縣志

周孔易字聖贊孔從弟乾隆鄉舉知廣東平遠縣縣有盜夜入富民家覺而追撻之盜竄鄰縣罹別案誣富民爲其黨而富民先已客閩鄰邑捕之急孔易偵之遣役假富民與盜質盜誤認役爲富民事遂白未二載卒於官子子亨乾隆鄉舉歷權廣東陽江海康英德知縣有循聲里吏議改授樂安訓導

府志

吳一嵩字克非新建人乾隆進士官河南正陽知縣盜賊屏迹調夏邑邑北地勢窪下水漲妨民田一嵩開新河以達水勢累遷四川重慶知府時討逆首僧格桑調赴大營隸將軍溫福幕下檄權松茂道進攻阿喀木雅

木蘭填總理糧餉及抵美諾布朗郭宗攻噶爾拉再移
營木果木一嵩隨將軍營經畫無餘力會逆眾突犯大
營軍潰一嵩猶督率糧臺官吏接戰力竭遂及難事

聞贈太僕寺卿予祭葬祀昭忠祠子嗣蕙以廕授知縣

府志

曾曰理字皋臣南昌人副貢生由教習議敘授中城兵
馬司副指揮改補浙江嘉松運判累升嘉興杭州知府
浙江海潮泛溢沖決塘隄鎮海尤甚曰理議於石塘外
疊石以殺水勢撫臣從其議由是鎮海歲免潮患轉江
南河庫道蕩葦營歲供河南工柴每不足額買運甚艱
曰理勘丈蕩地畫界分派無所避匿自是歲收率踰定
額擢浙江按察使免歸家居貧病以書畫償藥債歿之
日貧無以殮人爲助資治喪葬兄曰瑛監生官通判擢

福建臺灣道亦以幹練稱

府志縣志

趙春福字疇五奉新人開元弟乾隆進士授戶部主事擢吏禮部員外郎中出爲雲南知府時征緬甸理軍儲供億無缺諸路師入滇春福列軍校道旁按隊入城市不改肆屬吏假公科斂者劾之所部肅然稽鹽政杜私販官吏莫能爲奸尋調任武昌去之日民奉槃水加鏡於道左送之謂清如水明如鏡也權武漢道左遷歸家貧僦屋以居

府志

徐維綱字三立奉新人乾隆進士官浙江永嘉知縣縣故海疆多盜維綱弋獲其魁寘之法羣盜皆惕息俗尚鬼巫覘假諸淫祀言禍福維綱使人重傷巫巫訴之庭維綱曰無害也神必福汝已而巫死集邑民諭之曰神

不庇巫神無知也祀之何爲燬其廟逐眾巫聞者稱快
值歲饑不俟報開倉賑恤永人德之卽治所燬祆廟祀
焉後任湖南耒陽縣緣事落職

府志

阮龍光字見田新建人乾隆鄉舉知河南通許縣縣境
平行東南尤窪下數被水爲開東關外二溝南抵黑旺
營達太康境並疏東南青岡河涵洞九座自七步里至
陳家岡約五十里皆復故道水患悉平升湖北黃州府
同知權武黃江防同知駐武穴扁舟巡盜出沒所不避
寒暑積勞致疾卒於官祀鄉賢

府志

宋五仁字靜山奉新人父三汝康熙鄉舉工於詩金陵
倪永清歎爲西江的派五仁乾隆進士幼孤事祖母熊
繼母朱庶母郭克盡孝養熊嘗病噎不食五仁亦不食

禱於神請減己算以益祖母弟五義郭出也五仁攜持
出入如左右手官九江教授二十年勤於職爲詩文皆
有法度郡人至今頌之年七十歸母朱年九十五仁依
依若孺子朱歿哀毀卒祀鄉賢府志

龔正字慎修南昌人拔貢生少貧母家故世族多藏書
正縱心搜討學日益富工古文辭以光祿寺卿劉吳龍
薦試博學鴻詞科生平厯游南北懷才不遇士論惜之

府志

張素我字一函

縣志作
函庵

南昌人歲貢生少與新建裘曰

修同受知於督學李鍾儔目爲奇才素我博學好古爲

文章自闢蹊徑詩主性情不事規仿

府志

甘立功字惟敘禾次子乾隆進士改庶吉士習國書

散館授編修己卯典陝西鄉試疾卒於西安官邸年僅二十九立功讀書過目成誦爲文章下筆千言爲人謙抑和易咸以未竟所用惜之兄立德進士官知府府志楊厘字子載大業子拔貢生厘六歲解吟咏以層臺起片雲句名噪人口長與鉛山蔣士銓南豐趙由儀武甯汪勣齊名有江西四子之目旣膺選例赴都試以母老病告有司不許固請乃已子蜀年乾隆舉人蜀御副貢

生府志

萬廷蘭字芝堂南昌人乾隆進士改庶吉士散館授直隸懷柔知縣調宛平再補獻縣縣當孔道繇役多派民車廷蘭之官卽令禁絕俗好訟持狀來者多婦女廷蘭決罰其夫男風少止嘗建萬春書院修河間獻王墓及

其廟擢知通州通爲糧艘匯集之區廷蘭察利弊陳便宜數事旋以鄰邑事株連繫請室十五載日事吟咏得釋歸里益潛心經籍啟牖後學年至耄耄娓娓弗衰應聘修南昌府縣志文獻賴之卒年八十有九

府志

閔鑑字治資南昌人乾隆進士官浙江遂安知縣遂安地瘠民貧風俗刁健鑑力與圖治民有訟者非閭實不輕繫疲俗漸革嘗建復瀛山書院以教士遂安二十餘年無科名至是鄉試一榜得三人大計卓異擢玉環同知地懸大洋多盜賊鑑立保甲嚴捕緝民獲安居沿海煎鹽官爲收發上官以爲利藪求貨於鑑不應曰竭竈戶之錢以媚上吾不爲也上官銜之會擢守延安既得代數月不能成行銜者釋然始知其清爲稱貸以資之

至延安旋調同州以卓異擢廣東肇羅道未赴值禁旅
過境支應同州軍需晝夜不自休遂成疾乞假歸近里
聞母訃哀毀過甚抵家未數日卒

府志
縣志

龔元玠字琢山南昌人乾隆進士知貴州銅仁縣事縣
多山易藏奸城舊七門守門兵無棲止值風雨往往他
適元玠爲建卡房嚴防守學宮圯倡修之緣事降調改
撫州教授再以承審失實鐫級罷職元玠少貧好讀書
未嘗從師學旣爲諸生取歐陽修限字讀九經法畢誦
注疏由是貫串羣籍以光祿寺卿劉吳龍薦舉博學鴻
詞又以巡撫阿思哈薦舉經學皆報罷留心河務窮竟
源委嘗偕友人北上渡黃河風不利舟蕩洪濤中人有
怖色元玠推篷左右指視慷慨談論無所畏又買小舟

徑赴海口測量去路作黃淮安瀾先資編癸酉應順天鄉試考官孫嘉淦見其治河策拔登鄉薦性至孝年五十遭父母喪不茹酒肉不入內室鄉人無少長稱龔先

生年八十二卒

府志 徵後錄 鶴

彭良騫字晉生南昌人乾隆進士選授鹽山令鹽山多盜甫下車卽獲巨獍置諸法盜相戒毋敢入境邑舊徵賦責富戶催納曰單頭充役者率破產良騫爲革除仍循滾單法士民頌之以最擢河間同知格部議量移天津濱海產鹽私販充斥良騫但詰首梟餘不問曰民窮則爲盜絕其生計是迫之盜也以勞致疾卒於官

府志

葉敏字紫珊新建人幼穎異讀書目數行下乾隆鄉舉選授山東茌平知縣茌平有趙王河故道下流入禹城

其地沮洳蘆葦壅遏積雨輒泛溢敏疏濬上下流水患
遂息擢知河南陝州州有峽石驛爲秦晉茶鹽轉運之
區陡峻偏仄車不得方軌敏闢之稱坦途焉旋除山東
曹州守以事去官子庭和舉人官直隸蔚州牧亦有聲

府志

彭元瑞字掌仍南昌人廷訓子嗣父廷誥官教諭元瑞
生而亮特三歲授經書輒成誦七歲誦春秋外傳七十
日而畢乾隆進士由庶吉士授編修以進寶積經恭跋
受

上知歷官通顯又進萬福集成讚古稀頌冊皇極殿鐙詞入庚
全韻詩四得頌恭跋

御製全韻詩褒諭稠疊珍寶駢蕃

賜第及紫禁城騎馬嘉慶初元充

寶錄館總裁專職起草元瑞以文學進識見卓犖熟諳掌故一時典禮多成其手立朝四十餘年中外想望丰采遷擢之優廷臣罕出其右洊擢禮兵吏戶工五部尚書晉太子少保授協辦大學士以事免旋起工部尚書晉太子太保充文武會試總裁各一鄉試正考官四任學政三充殿試讀卷官七教習六科庶吉士掌翰林院者十二年嘉慶癸亥卒於官年七十有三

上聞軫悼

賜陀羅經被遣總管內務府大臣奠茶酒仍贈協辦大學士諡文勤予祭葬入祀賢良祠元瑞至性過人事親孝兄弟友愛篤師誼好賓客留意人才汲引不遺餘力經賞識

者多爲名公鉅卿讀書一覽不忘下筆千言時稱元瑞才氣豪邁如東坡德量含宏如永叔子翼蒙字著初十歲能屬文乾隆進士改庶吉士授刑部主事出知歸德府以惠愛稱擢江南鹽法道左遷禮部主事時元瑞年七十矣翼蒙出而盡職入而侍親咸竭其力轉刑部員

外郎卒翔履一品廕生習恆趙州知州

府志縣志

彭元瑋字守璞廷訓子由舉人選授浙江雲和縣調會稽治以誠實理積牘徹曉夜獄無冤滯邑東北隅野曠遺骸無數元瑋購地置義冢盡掩埋之修安豐閘立嘯唘石塘築高壩土塘以禦水患遷杭州西防同知旋失察註吏議乾隆閒復原官分發四川赴登春軍營屬木果木軍潰賊并陷登春元瑋故文吏不能戰乃下馬踞

聞贈副使道銜

地坐其僕環泣請行厲聲叱之解衣帶授僕王升曰若持此緣窄道歸又授囊中脫齒十有四曰此我骨也賊至僕來福先死元瑋投懸崖落澗水淺復入深渦而歿僕龔祥亦死王升蛇行七日至美諾以衣帶及齒歸事

賜祭葬廕一子良稷官福建晉江知縣同時有馬雄官陝西略陽營守備隨勦金川攻日旁礮卡傷重死照陣亡例廕卹又崖州樂安巡檢黃彬勦黎匪中箭死贈按察司經歷廕一子又湖北行營千總張天祥嘉慶五年勦賊於南漳雙竹園陣亡事平

賜祭葬銀兩世襲雲騎尉元瑋雄天祥並入祀昭忠祠

府志

衷以燠字聲元南昌人乾隆進士歷官四川廣西知縣

擢同知轉刑部員外郎再出爲雲南曲靖知府時上官有以私意入人罪者會鞫諸員噤不復問以燠獨執理平反風采最烈旋以事罷官僑居川中嘉慶癸酉重赴鹿鳴及丁丑例許重宴瓊林以年老不至卒年九十有五同邑鄧賚乾隆舉人官知縣道光己亥亦重赴鹿鳴年百歲卒

府志

劉芬字湘畹新建人乾隆進士授禮部主事累擢郎中轉御史工科給事中裘曰修嘗謂劉君品學兼優可爲師法遣子行簡行恕孫元復增壽從學焉官京職三十餘年敝車羸馬處之泰然屢薦外官不就以目眚乞歸彭元瑞語人曰吾與湘畹爲貧賤交見其始終一節可稱完人

府志

杜琮字方水新建人乾隆鄉舉官福建光澤知縣量移漳浦莠民李阿閔黨滋事立禽治之擢知廣西南甯府調桂林遷廣東督糧道累官廣西按察使三遇秋審案無出入以守桂林時護鹽道預報商額全完罷職旋起河南知府補官懷慶遭母喪歸卒祀鄉賢弟泰錡鈞並以進士官知縣有循聲

府志

熊之理字肖石學熊子乾隆鄉舉篤志經史旁及識緯術數之學足迹半天下迄不能見於時晚爲新喻教諭以卒鉛山蔣士銓作懷人詩甚稱之

府志

蔡承烈字靜芳奉新人乾隆鄉舉以大挑官福建知縣權長樂福鼎建甯諸縣事以憂歸服闋補平和縣平和素號刁悍承烈甫下車顏其堂以見意曰平之以和崧

餘頑梗悉化公事之暇讀書如諸生臬司方正嘗於大吏前指之曰聞有讀書知縣此其人也未幾疾卒民哀

泣如失慈父母

府志
縣志

裘麟字超然曰修長子乾隆進士改庶吉士授編修

上選翰林能書者十人繕

御製集麟與焉旋卒於官年二十有九卒後所寫書始進呈

命賜文綺掌院以麟卒奏

上爲憫歎命卽賜其家時曰修方往河南視河

降旨慰勞河閒紀昀曰修書稱麟交遊頗廣而不事聲華見

事明決而不存刻覈爲文質直而不墮浮靡同館諸人

皆以爲足概麟生平子元復舉人國子監學正元淦進

士改庶吉士授檢討

府志

金光斗字冲南奉新人乾隆進士知甘肅漳縣升狄道知州狄道有洮河久淤塞光斗倡民疏濬躬親畚鍤導引數十里民田賴之邑東超然書院爲楊椒山所建屋久圯光斗卽故址重建延師課士民知向學值旱災甫具文牘先發銀米以賑上官將劾之光斗持議不屈卒得請全活甚眾民呼金佛調涇州以親老不能就養援例授刑部湖廣司郎中尋告歸先是光斗父天彩因事牽連解部質訊光斗徒步隨父晝夜行三千餘里大學士傅恆訊天彩無辜得釋謂天彩汝子孝宜勉其讀書及成進士傅恆語同列曰孝子果中進士京師傳爲美譚旣歸遭親喪哀毀卒

府志

楊其謨字禹陳豐城人唐詩人王季友之裔先世避寇

易姓楊乾隆鄉舉權直隸南皮縣以清正聞復權保定縣縣多水患步行田畝問民疾苦爲民請賑出己貲創玉帶書院親爲督課給膏火資嘗奉檄讞文安疑獄摘奸發伏人稱神明歲又旱捕蝗勘災以勞瘁成疾卒

府志
縣志

喻宗澤字坎思新建人乾隆進士知青城縣事甫下車邑有蝗宗澤捕滅之已而水潦淹田廬宗澤乘筏徧勘乞發賑民賴以濟戊戌歲復旱手定輪賑法先期詳覈戶口家給牌登民大小丁口以四鄉分四日至期家出一人赴廠持牌爲信與以一日粥三日糧災黎稱便上官善其法通行各屬青城額解部硝及閩硝詢於吏知轉資他境民戶苦累至於流亡因詣大吏力陳得免解

府志

郭良義字儀先新建人少孤事母稱孝力學敦行每謂
修己治人當有聖賢實際乾隆鄉舉官江蘇知縣所至
有循聲權青浦創建書院出餘俸爲膏火貲立義田義
倉歲饑出倉穀賑濟昭蘇甚眾補靖江漕政舊多波累
良義釋無辜者震讐回邪士民稱快暇爲民課農桑令
務本業旣去官謳思無已子觀辰湖北荊門州知州孫
文匯甘肅布政使

府志

涂甯先字致遠靖安人能詩時楊屋趙由儀蔣士銓汪
勅稱四家甯先與齊名學使金德瑛集一時知名士爲
十八子選刻西江風雅甯先其一也乾隆癸未成進士
選巢縣知縣甯先祖父皆爲縣令習知利弊旣之官大

吏重其才調知桐城邑慶得賢令以獲盜功權知滁州
乞休歸主晉陽平定書院纂平定州志弟寓先乾隆舉
人案先諸生

府志

帥光祖字宗文奉新人念祖弟乾隆進士爲諸生時巡
撫白潢學使王思訓徵各屬知名士肄業豫章書院光
祖兄弟與焉雍正壬子與從兄繩祖從子家相同舉於
鄉時人目爲三鳳光祖三十年後始成進士以臨江教
授終工駢詞有詩名

府志

胡宗定字寓棻甯州人乾隆鄉舉大挑知縣發陝西親
老改湖南及終喪仍赴陝西歷權三水西鄉吳堡南鄭
宜川諸縣補鎮安所至稱治湖北宜昌教匪蔓延及陝境
宗定練民兵守城賊不敢犯踰年權孝義廳同知兼五

郎通判屢奉檄購兵糧日馳三百里接解軍餉者三遇賊褒城驛奮勇血戰賊退宗定以勞致疾卒嘉慶八年照陣亡例卹加贈同知銜入祀昭忠祠廕一子入監讀

書

府志
縣志

盛元績字蒼霖武甯人乾隆鄉舉工詩文新吳鄭玉慈南康謝啟昆皆稱之元績孝於親友於兄弟以大挑選授峽江教諭讀書立品垂型後進峽人士多誦之

府志

鄒玉藻字位元奉新人乾隆進士由庶常授編修湖廣道監察御史兩爲順天鄉試同考官三通館

四庫全書館纂修官校勘維謹旋歸里卒

府志

鄒人敏字功捷奉新人乾隆進士官河南盧氏知縣再任福建甌甯調沙縣沙俗惑於風水之說墳墓遷徙無

常甚或分骸以厝爭訟不休人敏痛切諭之比於大逆

愚俗漸革旋改補峽江教諭

府志

朱紉蘭原名天申字周愛南昌人乾隆進士聞父訃歸補試改庶吉士復遭母喪散館授四川安岳知縣安岳民好訟貧者藉人死陷無辜乃作勸民歌數十章俗爲少變以卓異擢湖南岳州通判道州有巨案紉蘭奉檄往理反覆開導罪止渠魁事乃解境在永郡南谿河狹小不通商賈民有粟不得易錢往往逋賦紉蘭下令以穀折銀擇老成吏運他郡糶賣以輸庫自是民無積逋大計卓薦權知辰州府兼護辰沅永靖道踰年黔苗倡亂竄辰州紉蘭率兵赴援至鎮筸力破重圍時總督駐軍辰州令理軍儲百務倥偬歷二旬餘未交睫會代者

至檄率鄉勇駐古丈坪剿賊所至克捷又承檄之乾州
招撫被脅各寨苗人於是苗目吳廷舉諸人赴軍營乞
降者百餘寨大帥嘉其能題補永順同知而紉蘭以積
勞成疾乞歸不數年卒

府志

喻升階字殿傳新建人乾隆進士改庶吉士累擢江南
道監察御史掌湖廣道巡察通州漕務爲京朝官二十
餘年義命自安不樂干進在諫垣多所建白致仕卒
徐曰都字中甫奉新人乾隆進士博學洽聞少工詩古
文與兄曰明曰昌齊名

高宗南巡曰都獻詩

賜一縑嘗官長汀知縣罷歸主講書院者垂四十年宏獎後學
甚摯青陽王尚書宗誠萍鄉劉侍郎鳳誥皆其所識拔

選長甯教諭之官三年卒曰明進士四川知縣曰昌舉

人陝西河南知縣

府志

曹勳祖字虛中家甲曾孫乾隆鄉舉官屯留知縣調曲陽時代州水災諸生上請免賦而棗林諸處屯糧爲累尤甚曲陽舊屯已屢請免皆格於例不行勳祖反覆指陳乃得請旋升代州知州而棗林屯糧事復格部議勳祖又力述屯丁困苦狀大吏以聞卒微

恩命屯民感之繪萬燕堂圖以頌萬燕堂者家甲治龍溪時置

義冢掩骼萬餘有海燕數萬回翔廳事因名其堂旋以

病乞歸越十餘年卒

府志

戴承創字彊善新建人學有根柢從父士

一作仕

冕歲貢

生任臺灣府教授承創嘗從之渡海經歷險遠爲文章

有奇氣時同里周學健視學福建見其文甚賞之自弱冠爲諸生困躓場屋者二十餘年五十後始舉於鄉再赴禮部試不遇絕意進取平生持己嚴謹遠近奉爲師

範

府志

彭孕星字斗占奉新人乾隆進士少讀書百丈寺恆經年不出旁通藏經於學別有所得既成進士官直隸廣昌知縣數月卒有勸民詩廣昌人今猶誦之子習祖舉

人

府志

朱紱字輯五新建人乾隆進士由庶吉士授編修擢中允改御史屢分校北閩典粵東粵西試衡文日漏五下輒起曰藉此清明氣無屈真才也工書有索輒應嘗謂作字所以養心率意則心不存程子所謂執事敬是也

府志

彭元琬字實之廷訓子少善屬文長通韻學工詞賦尤精疇人家言旣舉於鄉直隸總督周元理聘主滄州書院士多造就壬辰成進士改庶吉士充永樂大典纂輯官旣授職檢討以

文淵閣校理兼充

武英殿四庫全書館三通館提調官丹黃昕夕不憚寒暑

擢中允以事左遷檢討再降內閣中書積勞成疾卒

府志

彭元璟字皆山廷訓子五歲父歿母教之學十歲能屬

文比長以優貢生考取官學教習出權休甯知縣補金

匱調寶山邑中有兄弟訟者元璟反覆開導卒相感悟

持泣而去

府志

謝士廷字邦幹奉新人乾隆進士官湖北穀城知縣甫
莅官荊州老龍隄決士廷奉檄分段修築隄成調棗陽
未幾復任穀城會教匪起襄陽開穀城界其中總兵官
方出勦辰州營兵不及二百士廷募鄉兵激以忠義出
擊賊斬僞都督胡英總督畢沅上其功尋以禽童紹虎
加同知銜士廷以文吏嫻武事意氣豪邁嘗橫刀策馬
前謁大帥明亮德楞泰於軍營指陳形勢大帥壯之在
穀城十五年四爲鄉試同考官又創建筑陽書院修復前
明死事縣令阮之鈿祠民愛之稱謝青天

府志

曹庠業字孝倫茂先孫拔貢生玉山教諭擢知縣歷任
浙江武義錢塘福建尤溪漳浦遷廣西新甯州改四川
茂州調瀘州精剖斷目視耳聽口詢手判一時並用人

服其能時川楚賊起瀘賊劉涓號三隻眼素桀驁將謀
不軌庠業以計禽之夔州爲川東保障經略勒保奏權
府事庠業修軍械峙糗糧爲戰守具賊至與提督七十
五合擊之積勞成疾弗少懈時奉

諭旨勅撫兼施庠業募謀懷金入賊中宣布

德意脅從解散賊袁霄遁而庠業亦遂病劇就醫成都未達歿

於忠州舟中子熊嘉慶進士累官至御史孫聯桂道光

乙未一甲第二人及第官湖南衡州知府

府志
縣志

裘行簡字敬之曰修三子曰修卒後二年

高宗眷念舊臣特賜行簡舉人內閣中書旋充軍機章京遷侍
讀出爲山西甯武知府調平陽以母熊年老乞內用補
戶部員外郎仍直軍機處遷刑部郎中在軍機先後二

十餘年綜覈敏練嘉慶閒進內閣侍讀學士轉太常寺少卿犒軍陝西

賞戴花翎陳川陝軍情語中肯要游升太僕寺卿除河南布政使調江甯以母憂歸未禫起權福建布政使調直隸護總督印先是各省賑貸轉輸供億皆由州縣錢穀出入多未釐正嘉慶元年豁免民間積欠地方大吏分別例案不能盡一概以蠲除入奏官吏借爲煩擾之具行簡所至立法鉤稽塞僥倖去煩苛福建布政司冊爲大綱十有一行簡於其中分子目一千五百有奇於是支解分數毫釐皆見吏不能欺其在直隸也定民欠分年帶徵官虧分年追繳清釐兩省帑藏銀數鉅萬旋以兵部侍郎銜署直隸總督十一年永定河溢行視堵築歿於

途

上聞軫念命予實授總督

賜祭葬諡恭勤長子元善賞給舉人行簡服官中外公餘手不

釋卷勤學如老諸生崇祀鄉賢祠

府志

胡榮字翠崖新建人父萬吉知縣祀鄉賢榮乾隆進士
編修歷御史左遷刑部員外郎再擢郎中旋以知府發
陝西權西安同州兩府補延安府多惠政以疾卒於官

府志

涂日煥字曙山新建人乾隆進士官內閣中書出爲廣
西同知權龍勝通判龍勝苗疆無考試爲請置學額二
人借補柳州通判權平樂府會黔苗滋事日煥督餉儲
至軍權西隆州主百色糧務感瘴疾卒

府志

胡濬源字甫淵甯州人乾隆鄉舉官河南商水知縣遇事能斷以乞養歸再赴河南權考城蝗不入境補新鄭時楚匪方起徭役無虛日濬源曰甯毀家毋累民客兵入境民情洵洵親爲安撫事定引退稟性冲淡歸以書畫自娛

府志

甘定進字退思奉新人官河工通判時方輯運河備覽定進與焉旋權兗州府泉河通判河決馬家店定進治東壩五晝夜而告竣補東昌府上河通判尋調下河河決青龍岡檄定進總其事擢開封上北河同知會隄工垂成風汎驟至復裂定進奮身搶險隨墜入水遇樑木抱之流漂三十餘里至閤家樓得救而甦大學士阿桂方在工次親往視爲之嗟嘆書杭葦盡臣四字以贈事

聞照臨陣一等受傷例賜金及引

見垂問情狀具以實對

上稱爲有功有福尋擢廣西思恩府以憂歸起山東萊州府禁

昌邑海口私運平穀價終山東按察使

府志

裘增壽字祝君曰修孫乾隆鄉舉充

四庫館騰錄選河南唐縣知縣卓異升福建漳州同知調

泉州廈門同知擢漳州知府量移直隸正定知府奏對

稱

旨調河南南陽知府皆著政聲仍調補漳州守郡十年弭盜安

民以勞疾乞歸

府志
縣志

鄧朝縉字擷坡南昌人乾隆進士官福建永福知縣縣

胥侵冒錢糧已積久朝縉發其事或怵以累上官朝縉

曰畏上官不畏國法乎卒發之無何閩省虧空案起州縣罹罪者十凡八九一時皆服朝縉先見朝縉故強項大府亦才之心勿善也既積歲不遷自乞改教職厯官

南安瑞州教授

府志縣志

甘立猷字惟弼禾四子乾隆進士改庶吉士授編修典試河南分校禮闈狀元石韞玉其所取士也先是立猷祖汝來分校癸卯會試得修撰于振至是立猷得韞玉時以爲嘉話轉御史遷兵科給事中轉戶科掌印給事中巡視東南城因事左遷刑部員外郎旋領東倉監督以疾卒於官立猷工詩文著述不倦奏議亦通達故事會試覆試文二詩一士倉猝多罹罰者立猷請改試一文一詩今循用之

府志縣志

宋鳴珂字楮桓奉新人五仁次子乾隆進士登第後歸
原班謁選援例授南城兵馬司指揮卒於任鳴珂少負
異稟尤長於詩問學於桑主事調元陳布政奉茲三十
後專以同邑帥家相爲宗論者謂家相卓山集佳處不
減杜陵鳴珂詩不減卓山云弟鳴琦自有傳府志

萬承風字卜東一字和圃甯州人乾隆進士由庶吉士
授檢討入直

上書房侍

宣宗講出爲雲南副考官時

仁宗在潛邸賜詩寵行典試江南旋督學廣東除奸弊正士習
屢奉

密諭詢大臣居官行事輒據實陳奏方試瓊州海寇猝發承風

効遊擊之怯懦者軍政肅然初承風由侍讀左遷檢討至是擢右贊善進少詹事厯充山東正考官山東學政入直南書房累遷至禮部右侍郎充浙江正考官尋督學江蘇路經袁江視荷花塘河工取勢太直屢築屢圯奏請復舊如議行調兵部侍郎以陳請祝

嘏被議左遷內閣學士再調安徽學政時定遠士與鳳陽胥役有隙至試期輒修怨當事或庇胥役士益忿承風據情入告飭撫臣嚴詰繩胥役如法再擢兵部侍郎充講官權工部右侍郎兼管錢法堂事承風受

上知深屢司文衡所至得士心居官端慤謹慎厯數十年如一日以引疾歸逾年

上猶遣官垂問亟思簡用旋卒年六十一入祀鄉賢祠晉贈禮

部尚書銜追諡文恪

敕賜祭文碑文道光元年遣官致祭十二年晉贈太傅子方雍
自有傳方貞甘肅西甯府經歷方熙方楫

賜舉人

本傳
府志

嚴廷典字聖言奉新人乾隆進士父志洪諸生早卒事
母以孝聞受書於大父盛昞日記數千言初官甘肅西
和知縣俗醇樸尚武少文廷典創修上祿書院集生徒
講論其中士始嚮學移官廣東高明知縣邑北濱大澤
多水患廷典相度地勢修永安亭以障之民咸倚賴以
病乞歸

府志

涂日烜字嶠舒奉新人乾隆進士知直隸完縣調清苑
累遷山東泰安知府未之任卒年四十四完縣徭役舊

例民七旗三有武舉某把持旗籍專責於民日烜至廉得其狀詳革之而旗差始復民舊供柴薪急則伐梨棗日烜請於大吏刊石禁之又嘗出己貲建書院鄰邑士人多就問學官清苑時值

上西巡日烜迎

轡道左

上注目久之謂總督劉莪曰此人似方觀承

賜之荷囊文綺日烜益感奮累權保定正定河間知府所至以廉直聞會段文經滋事大名總督領兵出保定獄囚先與文經約期爲應日烜偵知之夜請兵圍獄囚脫械將出傷一武弁羣視駭愕日烜率壯士直前縛一人餘不敢動皆就禽日烜爲諸生時循循若處子及莅官強幹

所至有聲人皆異之

府志
縣志

曹六興字霞城新建人諳兵事初官四川雅安縣典史以廓爾喀用兵屢著奇功累擢成都知府屬漢夷構釁權建昌道知甯遠府所轄地北大渡河南金沙江漢夷錯處地凡千里六興酌就見在漢民編聯保甲所佃之地在土司者以土司爲綱在夷人者以夷人爲綱而以漢民編其後願遷內地者地給附近漢民兼種夷人不
得招漢佃督所屬員周歷大小涼山二十三夷巢紙約木刻編連保甲兩載歲事凡安插漢民八萬七千餘戶丁口四十二萬五千有奇迷易紅卜二土司並披沙者保二十一邨聞風嚮化率願改土歸流編入漢甲其後清溪囑嶺巖猱夷滋事擾我邊廳界六興奉檄調集官

兵更募勇敢冒險奮擊匪眾四竄殲禽甚眾是役徵兵千餘未及兼旬訖事以功授四川按察使尋擢布政使官蜀垂四十年蜀民皆不忍其去六興亦視蜀如家族以四品京堂補用乞假歸卒年七十三

府志

吳紹瀛字哲言南昌人乾隆鄉舉早歲能文爲諸生有聲後乃以詩鳴上計偕報罷留都門與同榜章允登漆瑄倡和同鄉彭元瑞稱之官德興教諭卒允登初名煌字聲佩弱冠補諸生亦工詩嘗與同邑彭元琬吳芾高安熊中砥讀書豫章書院分賦百秋詩傳播遠近晚舉於鄉官崇義教諭瑄字亮功少失怙貧不能購書粗涉經傳下筆華藻瑰麗見者奇之旣而舉於鄉試禮部不遇旅食京華顛頓死吳芾字湘南戊子鄉舉卒年四十

七府志

張濤字見滄南昌人資性純篤事親以孝聞博學能文
乾隆鄉舉歷官新淦樂安教諭濤工書臨池三十年不
自懈弛嘗鑄鐵管三大二十四兩次十四兩又次五兩
長尺有一寸以羊毫爲穎撮五指運掉如飛自爲得古
人不傳之祕在都門時爲鐵筆作書圖觀者題詠殆徧
從兄潯拔貢生並擅文名有二張之目

府志

萬承紀廷蘭子副貢生工書畫讀書過目成誦夙負經
世略湖廣總督畢沅湖南巡撫姜晟嘗招入幕府參軍
事會夜半賊薄營軍中大駭承紀假巡撫命飭士卒嚴
守毋亂行伍乃召別隊與後營夾攻之遂破走衡永民
爲賊誘將謀起應按察使獲渠魁得其名籍將盡殲之

承紀告巡撫愚民無知宜誅首惡而追脅從使得自拔
又建堅壁清野策後卒以此奏功時

朝旨漢民在苗疆者盡驅勿留承紀復請於沅言人情安土動
則生變爲作奏陳利害獲報可承紀在軍積功議敘補
官寶應知縣調元和因事落職江督百齡素識其才奏
復原官補山陽又以事落職先是有人爲匿名書散布
各省語多悖逆

嚴旨搜捕至是承紀獲妖人方榮升三十餘人並妖書偽印制
府以聞擢海防同知權知淮安府攝淮海道調任河防
所至有政績初承紀在江督幕府以河決王營減壩請
用前人束水攻沙法接築長隄又請復靳文襄磨盤埭
多蓄河水以通海口工皆獲竣在海防時河督黎世序

以盛漲議疏通承紀請挑宋家灘導河直趨海口眾皆
難之承紀請以身任卒收效在淮海道時堰圩十三堡
決口嚴冬風寒隄上冰合堅厚不可爲力承紀布薪於
上因風鼓焰冰釋可施隄防近浦獲全自堰圩旣溢淮
弱河強轉漕益艱承紀建議上開毛家鋪下開舊滅壩
以減黃益清又議建草廬於禦黃圩別築土堰瀦水度
足浮送乃啟廬放行今猶用其法子啟昀進士改庶吉
士授主事

府志

袁絢字續華南昌人乾隆鄉舉以大挑官四川知縣權
知樂至日坐堂皇受牒自書兩造姓名聽訟期會黏影
壁令自至隨予判決事無留滯吏胥不能爲奸再權射
洪一如在樂至時射洪多竊捕役爲之欺隱於是黜積

猾嚴保甲數月之後外戶不閉去官日士民扶送交錯

於道

府志

曹惠華字迪諧繩柱孫乾隆進士授內閣中書補軍機章京出爲山東副考官遷刑部江蘇司主事在公勤謹寒暑無閒惠華工篆刻精繪事書法得米顛神趣尤工小學先是庚子迎

鑾繪耕織圖以小篆恭錄

御製題跋並詩賦冊進呈

高宗幾暇覽前冊猶嘆賞之以語彭元瑞年五十七卒

府志

舒懋官字長德靖安人乾隆進士廣東英德知縣英德當粵衝地閩民獷號難治懋官措置裕如距城十餘里曰老地潯民煨石爲生忽有蜚語以聚眾聞上官將興

大獄懋官以身家保其非辜事得解再遷廣東豐順知縣豐順於潮屬爲循謹然湯坑羅家約一鄉地連揭陽強梗難治逋賦累萬抗不輸納無賴子禽人勒贖幾斷行者懋官練壯勇親駐其地禽渠嚴治召眾鄉老約法比戶告誡立期一月輸糧送犯半載之中賦清訟息復爲善良督臣蔣攸銑稔其賢調權潮陽作勸民歌以戒私鬪李步丹者尤魁點屢捕不得會其入城偵得之立寘諸獄民大和悅旋調新安再調香山攝佛岡廳同知以年老乞歸子恭行拔貢生考授知縣恭授進士官浙

江定海同知

府志縣志

郭正誼原名世誼字哲求南昌人乾隆進士直隸臨城知縣歷權任東鹿皆有聲舉卓異擢吏部主事再出知

福建龍巖州州界汀漳延平間民好私鬪多外盜正誼
令紳民聯絡警備約束子弟毋作不善勸立質庫通緩
急懲假冢圖詐者州大治厯權泉州興化福州知府護
興永泉道去官日民如失慈父母坐失察安溪獄左遷
督撫合詞保奏復原官府志
宋鳴琦字步韓五仁四子乾隆進士授禮部主事充校
勘

四庫書籍官

高宗八旬萬壽進九言詩百韻獲

賜大緞卽充

萬壽盛典纂修官嘉慶丙辰上恭衍

十全說獎賚如前旋擢員外郎出爲四川知府時川中教匪未

靖鳴琦累司饌以功增級權敘州知府補嘉定在官創
建九峯書院纂修郡志重新試院出己貲以爲眾倡猘
夷掠義眉卡鳴琦莅邊示以威信猘夷皆懾歲饑捐俸
以賑並開倉平糴所活甚眾會嶺夷復亂鳴琦奉檄筦
後路饌糈權川南道擢廣西鹽法道三權按察使引疾
歸里主講豫章友教書院年七十有八卒

府志

潛文曙字寅白奉新人副貢生甘貧嗜學能自樹立嘉

慶初入國子監肄業上書條陳時事

上留覽命仍在監讀書以母老歸得心疾卒

府志

曹師曾字雲浦秀先子生而穎異工書有家法貢生銓
注兵部員外郎累官至兵部左侍郎嘗陳嚴覈邊牆例
案不符悉中肯綮緣事貶四品京堂旋補太常寺少卿

江陰縣志卷之二 南昌府
轉通政副使

府志

萬承紹南昌人父廷蘭待罪保定承紹年始二十奔赴父所以一身周旋其閒事旋得釋考補方略館臚錄議敘得按察司經歷借補山東平原縣丞旋權知臨淄縣縣有巨族崔姓構訟案牘山積承紹召其族責以大義咸感泣誓不復訟擢壽張知縣未抵任檄修清平城工清平古漯河地多浮沙田半不墾因勸民植果樹官爲納賦利歸於民種成而後納賦民大稱便旣蒞壽張訛傳有賊至民震懼承紹單騎往偵知其虛諭居民無恐仍緝造言者民賴以安丁憂歸服闋赴選值河決壽張之張秋大學士費滄奏請留辦河工工竣題補嶧縣縣多曳刀匪承紹廉得禿者某匪首也方之官民出迎指

禿者曰汝非某乎禿者錯愕叱役繫之闔邑稱神再遭
父喪遂不復出時江決李家樓兩江總督百齡奏調築
江壩工成加同知銜尋檄權阜甯知縣瀕海灘地屢丈
未清居民爭業無能理者因請謝縣事履畝周勘復賦
升科既定敘勞績補長洲知縣引年歸

府志
縣志

舒性字荅原靖安人拔貢生累世承家學嫻詞賦杜門
著書日以歌咏自娛年近七十始以教職官弋陽未幾

老病歸里卒能詩善爲澀體

府志
縣志

盧金鏡字葑墅武甯人歲貢生弱冠入郡庠屢應鄉舉
不過余騰蛟聘爲子弟師余多藏書金鏡得肆披覽學
益富爲詩古文詞確有原本學者宗之乾隆間編邑乘
金鏡與焉生平行止端方年八十餘猶手一編嘗語人

曰身可窮名不可朽也

府志

夏家瑜字伯彩新建人廣東香山縣丞嘗禽洋盜何勝友擢知新安縣累官湖南寶慶知府緣事鍰級除江蘇蘇州同知值山東饑民渡河者趾相錯因倡設粥廠病者醫之死者瘞之未幾權知常州府時苦旱自無錫泉橋以往河斷流者三十餘里家瑜星夜督工疏濬鬚髮盡白旣竣事嘆曰河流通商賈便矣如饑民何詣鎮江守同請賑之歿祀鄉賢

府志

馬時俊字民章南昌人十歲能文十三歲應童子試邑宰奇其才擬錄冠曹偶而時俊不赴宰怒抑之嗣是危得危失或遇督學試亦不應浪遊粵東入陸豐幕爲令治奇獄有名粵東有疑讞訪之輒理性慷慨能急人患

雉鄉人漆某行鹽潮州虧帑將逮繫時俊舉積貲千金
解之人高其義尋以不耐酬應歸里讀書爲詩文清婉
書法出入鍾王懷素乾隆閒巡撫明德督學金甌合試
西江人士首拔之時俊年五十餘始補博士弟子食廩
餼督學汪廷璵尤重時俊嘗命代書滕王閣記泐石閣
西廡下

府志

舒夢蘭字香叔靖安人生甫晬卽隨父采願之官甘肅
繼遷烏魯木齊呼圖壁塞外少士人適北平進士宋曜
寰謫戍至遂師之天資英慧於學多通歸應鄉試屢不
售乾隆甲辰赴金陵應

召試名大起論者比於鉛山三蔣東鄉二吳三蔣者知廉知讓
知節二吳崑榕嵩梁也嘗入都爲藩邸上客又游杭州

將軍幕掌牋奏旋章門築居曰天香館自號天香居士
生平崇尚風義宋曜寰賜環後卒於玉田故里嘗往哭
其墓卹其家人求遺稿卽歸教人恆令窮究體用一源
弟子南昌龔鉞最知名

府志
縣志

張望字櫻壇武甯人少失怙事母以孝聞東髮讀書恥
爲俗儒之業擅文詞通韻學旣不得志於有司遂入樓
山教授生徒啜菽飲水晏如也南豐譚尚忠撫滇齋書
幣屬訂經史鈔紉芳齋文集書成報以良玉端溪石硯
曰以此比德嘉慶元年

詔舉孝廉方正當事將以望應力辭之

府志
縣志

許仁培字文山國學生先世徽州人家世儒術至仁培
廢讀遊賈南昌愛其風土遂居焉仁培宅躬端慤好義

急公嘗設衣藥二肆以濟貧困乾隆壬寅鄰不戒於火延燒無算惟仁培設肆獨存生五子次廷梁舉人廷楷

廷椿應啗皆進士年八十五無疾終

府志

張義中武甯人父某維舟河北岸失足溺水義中在南岸遙見大哭赴巨浪達河北援父出水父子皆無恙人以爲孝感

府志

吳學成太學生義甯州人性好善州西燕子崖十餘里沿河最險處路仄不踰尺上臨絕壁下瞰深淵頑石礙道路行者危之學成鳩工鑿山經營彌年行者稱便兄徒梁修梅店石橋兄子儀賓亦於要津修橋不求名凡所修建不爲碑碣

府志

舒一清字澄溪靖安人諸生性曠達有子二人長者不

慧幼聰穎鄰塾隔谿橋橋甚峻幼子方赴塾有以車輦布自橋而下者迅疾不可止觸幼子死觀者大譁縛車夫至官一清聞之慟旣而詣官請曰子死命也觸者無心盡法何益願釋之邑宰敬異謂之曰天道有知不使伯道無兒也嗣一清果舉一子成諸生孫恭彥貢生

府志

王明頌字三錫諸生武甯人里中羊腸灘石險壞舟人多溺明頌輸金鑿之夜夢神人戒止不聽神復降於庭獸面狎狹圍屋作金鐵聲家人震駭明頌不爲動督工鑿益急竟平其險又鑿洋坑石棧數里

府志

李秀章武甯人少偕兄質於陝挈家寄居安康教匪姚之富等擾陝境秀章集義勇殺賊賊披靡未幾賊乘陰雨撲山梁秀章持矛出斃執旗賊賊圍之數重復奮身

禽馬上一賊與共落坡下受十餘創不釋手遂被害事

聞照五品例議卹予世職同邑汪騰雲以把總死當陽潘蛟以

外委死達州劉陞

縣志作劉仁昇

亦以把總陣亡均入昭忠祠

府志

盧文魁豐城人隨征金川有功授湖廣提標中營守備

升廣西麥嶺營都司署提標中營叅將乾隆閒出師安

南遇敵力戰死之子延齡廕雲騎尉

府志

衛學純字景成豐城人乾隆武舉補荆門營千總嘉慶

二年從襄陽總兵馬瑀征四川教匪駐軍奉節牧牛坪

與賊戰屢勝賊僞遁學純隨瑀追躡伏發同遇害事

聞入祀昭忠祠子宗誥世襲雲騎尉官守備嘗剿川匪有功

府志

余銓字六符豐城人乾隆武舉補九江千總嘉慶元年

檄勦湖北當陽教匪歿於陣入祀昭忠祠子懋恩襲雲

騎尉

府志

方瑛字子微武甯人歲貢生少勤學嘗撰讀詩釋物別
其目曰釋天釋歲時釋地釋人釋官制釋祭祀釋禮制
釋藝事釋飲食釋宮室釋冠服釋器釋金玉釋鳥釋獸
釋蟲釋魚釋草釋木釋菜釋穀凡二十一卷體例蓋仿
宋王質詩總聞與近時陳啟源稽古編相出入門人吉
水教諭方瀚爲刊行王文恪鼎視學江西爲之序府志
趙敬襄字司萬奉新人生之前一日父青達見星隕屋
明日而敬襄生幼聰穎甫三歲母陳氏授四子書輒琅
琅成誦六歲能文九歲應試於邑書院已冠軍十五領
鄉薦次年偕百歲舉人李煒同謝

恩見者咸相衷異應春官試總裁官已定名第四以三場誤字
擯棄嗣是十上公車不第嘉慶己未始成進士改庶吉
士實錄館纂修官散館授吏部文選司主事以弟貴興
卒乞歸終養授徒講學遂不出門下聞達者甚眾自幼
日誦數千言老猶不倦著書繁夥最著者爲困學紀聞

補注

府志

彭良裔字斗槎南昌人嘉慶進士改庶吉士

召見

命在武英殿行走士林榮之旋以休致歸里

府志

婁謙字益甫先世浙之會稽人父誕禧游江右寄籍南
昌嘉慶鄉舉大挑知縣發河南權知商城有政聲踰年
除汜水邑爲中州瘠區民恆苦水患謙訪求河道疏濬

順流至今賴焉歷十年遷權光州量移杞縣杞有河務
殷重十倍於汜道光閒河水泛溢杞居下游謙於城上
張幕以居旦夕守築者三閱月積勞疾卒汜水杞縣並
祀名宦祠附志

方振字叶文南昌人少以文學知名乾隆甲辰

召試二等嘉慶進士改庶吉士授編修累遷翰林院侍講學士
卒於官振自通籍爲翰林二十年以文章供奉

內廷恭和

御製詩

上諭有學問好之褒典試雲南視學福建歷充武會試副總裁

武鄉試副考官子用儀進士累官陝西督糧道

府志

盧浙字讓澗武甯人少慧好學以明經衛道爲己任方

爲諸生時與同邑張望王子音爲性情文字交嘉慶四年成進士授主事歷官至太僕寺卿督學河南以六條訓士曰立志謹身勤學文行同符義利一貫感應不爽又作十字箴曰從理遏欲惠迪吉從逆凶士風爲之丕變歷爲言官悉掌故遇事敢言值英吉利遣使入貢使臣傲慢無禮奉

旨發還貢物遂令回國不治其罪浙疏請責懲通事引宋時高麗貢使驕傲蘇軾使人責押伴等又引陳希亮以于闐貢使橫暴持符嚴戒驛者事謂

聖德寬洪覆之如天地亦不可不震之以雷霆當時服其遠識又以風沙示警求直言浙上疏以追捕林清餘黨累及善良爲言任河南學政請以湯斌從祀文廟皆得

南昌府志
卷之二十一
南昌府
三
旨允行歿祀鄉賢

府志

萬方雍字季初承風長子拔貢生七品小京官累轉兵科給事中剛直敢言外擢湖南按察使執法嚴肅誅虐吏罷不職無敢干以私宵小膽落士庶呼萬青天

仁宗降諭勤儉修身公忠勵事始終若無閒斷和國師傅亦慶

有子也眷注優厚當時榮之權知布政使卒

府志

夏修恕字渾初家瑜季子嘉慶進士改庶吉士授檢討
歷御史轉京畿道授惠潮嘉兵備道戡匪徒靖械鬪又
立義學整飭韓山書院總督阮元知修恕長者委署肇
羅道兼攝府事平反羅定州案補督糧道權運司二權
藩司一擢湖南按察使調山西坐陽曲縣令案鐫級改
貴州思南府知府次子廷桀方以檢討典試黔中一時

稱異事從子廷楨山東兗沂曹濟道廷樾湖北布政使

府志
縣志

徐必觀字巽占曰昶子嘉慶進士官湖北鄖縣旋補蘄水以憂歸再選福建順昌緝治荏苒間安謐遷詔安俗好決賭創其名曰花會胥吏僕從利其潤輒爲欺飾必觀嚴禁絕之調任鳳山毀淫祀刑黠巫以祛民惑南路瑯嶠內傀儡山生番穴也番民搆毀堵泉絕溉民患之長吏議以兵勦必觀減從踰險三日至其地番以爲神懽舞濬源泉水利大興民奉澤被華夷額爲壽又嘗設法禽鄰邑巨盜盜悉平薦入都復留攝臺灣縣懲攘竊肅閩閩俗以漸厚辛卯冬檄勘風災自澎湖至瑯瑪蘭閱歲方歸途出嘉義見民間紛紛議遷徙知有變

亟請設備上官遣知府察視中途遇害嘉義失守郡城
戒嚴必觀奉檄守北門當賊來路事平論功晉五品秩
時鳳山被寇後民猶私鬪督臣以必觀得民心檄往解
散之乃修城廨招流亡創痍漸復以積勞無疾遽卒府志
黃中傑字嶮芝南昌人嘉慶進士改庶吉士授編修擢
御史累遷吏科給事中轉湖南糧儲道權按察使拯冤
釋滯楚人頌之以積勞成疾歸歲餘卒中傑學識卓越
性嚴毅言笑不苟爲諸生時卽負時望洎入詞館聲聞
益重兩充順天鄉試同考官甄拔盡一時之選在臺省請
禁城門需索釐正關市積弊更優貢朝考事例洎除莠
安良諸疏俱切中時務正色昌言不避嫌怨從子維烈
進士官河南歸德知府府志

彭邦疇字春農元瑞孫嘉慶北關舉人故事一二品大臣子姪登科專摺上謝時文勤健在親領引

見奉

上溫諭乙丑成進士改庶吉士授編修大考高第擢侍讀學士充廣西正考官再視學廣東精於衡鑒士風丕振擢國子監祭酒試竣入都旋任順天學政以耳疾致仕年甫五十邦疇博學能文自曾祖廷訓康熙朝入翰林本支相繼館選者四世七人解組閒居詞曹多執贄請業年六十四卒於都下子二長克儼四川候補同知次克儀咸豐進士工部屯田司員外郎

府志縣志

徐學晉原名士林字曉初南昌人六歲授書目數行下十一能屬文嘉慶進士改庶吉士散館授廣東文昌知

縣以培植人才爲先務邑有蔚文書院舊乏膏火貲學
晉勸輸於富民且爲定經久規約邑距省會三千餘里
當秋試貧士不能赴則出已貲贈行士民大悅地苦瘠
知耕種不知耘耔乃教以內地治田法越歲倍收偶旱
祈雨輒應其讞獄隨事判決無曠時無延累有洋匪闖
入境獲其首要移文鄰縣追餘黨上官嘉其能擬薦之
而學晉以母老力請改教職補南安教授亦不赴

府志

舒化民字以德靖安人嘉慶鄉舉權知山東棲霞福山
縣事補費縣調長清厯城諸縣膺卓薦任德州知州山
東撫臣薦治行第一授蘇州知府權蘇松常鎮太督糧
道改浙江杭嘉湖兵備道海潮潰隄目暑雨巡視不懈

權按察使鹽運使事以病乞歸

府志
縣志

黃中模字習之南昌人嘉慶進士改庶吉士授編修入直

懋勤殿與纂祕殿珠林石渠寶笈充江南副考官湖南正考官擢御史奏海洋偷漏弊略謂外洋與內地互市銀之漏入洋者歲不可數計鴉片私入中國戕人弋利均請嚴申令甲得

旨嘉獎署兵科給事中卒

府志

曹師恕字存中繩柱孫嘉慶進士改庶吉士授刑部主事補陝西司主事在部十年任事明決同曹推服爲文稟經酌雅力追先正儀徵汪觀察全德廬陵王侍御贈芳皆受業其門家居友愛甚篤視從子猶己子教養備至年五十四卒於官

府志

程喬采字晴峯新建人嘉慶進士授禮部主事補軍機章京擢江南道監察御史奏言安徽潁州久爲匪黨淵藪阜陽之艾集亭馬家店霍邱之三河尖臨水鎮諸處均有捻匪出沒請令皖豫兩省協力查緝又以州縣徵漕勒折買補致米色攙雜難資久儲請嚴飭各州縣親驗米色隨時兌收禁止開倉勒折買米攙雜諸弊江西舊俗殷戶聽農民以物質穀至秋熟每石加息二斗歸還三年不贖以原物變價抵償巡撫毓岱奏改一石加息三分質物以一年爲限喬采謂官爲督責事涉煩苛請仍聽民自便又奏定各省常平倉平糶章程畿輔大水五城設廠平糶請援照嘉慶六七年成案於五城地方自八月十五日起先行煮散並請於蘆溝橋黃邨東

壩清河四處一體煮散又奏向例商民出關必須驗票稽查直隸災區較廣貧民多出口謀生應權宜隨時放行免其驗票又奏直隸河流淤塞其急宜疏濬者莫如文安河請以工代賑及時挑挖均如請行累擢至戶科給事中出任甘肅蘭州道時逆回張格爾構亂揚威將軍長齡統兵往勦檄商采辦理軍需凱撤擢甘肅按察使遷浙江布政使丁母憂起調江蘇布政使權巡撫兼護兩江總督十二月擢江蘇巡撫二十九年英吉利夷船駛入長江偪江甯以疏防革職留任尋改山東巡撫調廣東巡撫會總督祁墳修虎門礮臺重兵防守倣行屯田之法時西夷各國就撫請通商商采偕諸大臣奏上貿易條約及漢夷情形旋遷漕運總督署江蘇巡撫

調雲南巡撫署雲貴總督時保山縣漢回構釁喬采偕
新任總督林則徐勦平之擢雲貴總督兼雲南巡撫騰
越夷人及永昌土司番族自相讐殺普洱府思茅各土
司暨野番亦聚眾滋擾喬采分兵平定奏邊外善後事
宜調湖廣總督廣西會匪滋事偪近楚界喬采赴湖南
防堵馳抵衡州獲逆匪左家發等會賊自全州竄陷道
州永明江華嘉禾桂陽復相繼失部議革職留任賊又
自醴陵繞偪長沙攻城不克引去喬采奏請駐兵岳州
得

旨衡州爲扼要之地仍令駐衡武昌陷子福培死之喬采以病
請開缺回籍調理旋爲編修何桂珍所劾遣戍新疆越
數年釋歸卒子福培候選道殉於武昌授雲騎尉世職

次子福增優貢生候選郎中三福均員外郎四福基主

事

本傳
府志

毛啟閔字仲勳南昌人嘉慶進士刑部主事總辦秋審

獄多平反著有刑曹駁案二卷

府志

程楸采字憩棠新建人嘉慶進士改庶吉士授編修出知甘肅涼州府護甘涼道篆逆回張格爾滋事調楊參贊遇春行營總理糧務權知西安府補陝西督糧道擢山東按察使遷安徽布政使值江湖盛漲稔知宿松縣康公隄爲三省保障急籌修築免攤徵諸款民德甚勒石號程公隄擢安徽巡撫上夷防募練水勇疏時皖兵多赴浙乃飭所屬練民勇未幾江甯告警楸采卽日馳赴蕪湖勘形勢於東西梁山扼要防堵擇險設伏並請

調豫楚官兵兩湖江西火器以備夷情叵測陳奏四事
悉中肯綮調浙江巡撫未赴任以疾卒於皖署祀鄉賢

祠府志

周春祺字應侯南昌人嘉慶進士授內閣中書歷遷刑
部主事監察御史吏科給事中遇事直言多切時弊言
江南佃湖營把總程九齡及糧艘大河三幫伍長周維
翰諸不法狀又言山東武定府商河縣教匪董坦滋蔓
流毒又言外省大員不得以隔品試用人員權攝又言
各邊倉積儲本有春糧秋補春借秋還之例積漸廢弛
遂至有糶無補有借無還宜飭查以重邊防最後言浙
江提督祝廷彪罪重罰輕及廷彪勒令休致益感奮遂
言兩廣督臣琦善宜回直隸原任已革粵督林則徐宜

假以尺寸之柄令獨當一面帶罪立功坐是罷給事中
還原官旋以稽查銀庫被議再起刑部主事道光丙申
充會試同考官年七十一卒子法鏞舉人

府志

王協夢字松廬新建人嘉慶進士由庶吉士改工部主
事道光九年升都水司郎中派修西直門石道工既竣
減節石料銀六千兩繳歸戶部以備荒賑擢山東道監
察御史外轉湖北施南府知府施南地界峒蠻歲方饑
眾庶兇懼協夢下令禁帶刀劍犯者捕之母及平民又
告諸鄉閭誼重讞鞠法嚴悔不終訟者聽無何峒蠻慕
化歲亦漸稔升江蘇常鎮通海道以積勞邁怔忡疾回
籍先是協夢曾祖用瑜有武功授九江城守千總因寄
居焉協夢服官後於潯陽近族捐貲置義田本邑置義

岡及公產積書萬卷藏於祖祠

府志縣志

裴元善字葆初行簡長子五歲能誦唐詩以父廕

賜舉人官內閣中書充方略館分校文淵閣校理仍中嘉慶進

士改庶吉士授編修典試山西稱得人視學貴州未終
任遭母喪歸元善負才諳年未五十遽卒士論惜之

府志

縣志

胡元瑛字崑來新建人嘉慶鄉舉由教習官陝西知縣
歷權零永壽邵陽諸縣代理整屋補藍田調涇陽在藍
田最久修城垣勸農桑飛蝗入境皆自斃不害禾稼一
充鄉闈同考官任涇陽三年以憂歸起復授甘肅靖遠
縣之任數日卒祀名宦

府志

毛輝鳳字梧生豐城人嘉慶鄉舉初權彭縣縣民以灌

溉不均構訟數十年不決輝鳳勅設平梁分七河水均其利而爭以息權灌縣築都江堰疏九河水源權江汕革除差徭積弊及諸苛額補綦江權樂山又調巴縣行保甲嚴捕務奸宄盡斂一時有毛青天之稱年五十四卒祀鄉賢彭縣綦江樂山巴縣並祀名宦

府志

傅猷著字紹先宏烈七世孫嘉慶鄉舉歷權山西交城長子襄垣汾西諸縣補神池兼攝五寨偏關篆所至稱治調猗氏平糧價繕城隍察奸吏振士風十年如一日猗之人尸祝之咸豐閒推升太常寺博士紳民懇留格於例不行踰年兵部右侍郎王茂蔭疏薦循吏黃良楷等八人以猷著居山西治行第一將擢用猷著已病歿於猗氏士民合請祀名宦祠

府志

郭文匯字朝宗新建人嘉慶進士改吏部主事升郎中
出守泰安歲饑立法捕蝗發粟賑民擢山西鹽法河東
兵備道遙遲渠決壞鹽池議脩費三十餘萬文匯以十
四萬金竣事嚴絕苞苴汰冗費以恤商旋擢廣西按察
使讞獄有神明之稱授甘肅布政使未行疾卒

府志

程煥采字曉初新建人嘉慶進士改庶吉士授編修繇
御史出知湖南衡州府以延書院主講忤上官乞養歸
里親歿終制選湖北鹽法道總督某將更鹽政煥采以
商民並困勸止之擢按察使調湖南遷江蘇布政使權
巡撫尋以病告歸咸豐癸丑後江右迭遭寇警首倡捐
貲修濬城壕命子修禮出治團練事毀家紓難無少惜

府志

龔鉞字適甫南昌人諸生幼慧解吟咏及長嗜學藏書甚富益肆力古學於詩功力最深師事靖安舒夢蘭而安吳包世序其集謂青勝於藍先是鄉人王猷定四照堂集鈔刻本鉞爲校定刊行由歲貢援例官訓導歷權廬陵宜黃永甯學官克盡其職

府志

劉子春字一峯新建人有夙慧讀書能得閒爲郡諸生數十年困於場屋學使李潢奇其文置第一子春刻意爲詩古文顧無知之者所居近僧寺偶爲僧題畫象又序其宗系督學汪廷珍見之大驚異延之入見閱其四友齋稿題詩以贈繼又見賞於督學王鼎一時賢俊皆從之遊大學士劉墉聞子春名寄以詩有吾子詩名傳海內老夫心迹徧寰區之句僑居百花洲側寂寞以終

無子所著書盡佚

府志

鄒昉字意園新建人少以清苦矢志不苟同於人出應試不爲詭遇武甯盧浙未遇時訂交最密後視學河南具書聘之以母老辭家居兄弟怡怡至老不衰友人鄧潔病昉爲調藥須人獲不可得冒雪求之數十里外及歿經理喪事代爲立後同邑羅安見之驚曰今日相遭眞解瞶矣遂定交年八十餘以布衣終

府志

張紹璣字曙軒武甯人諸生援例官訓導好善樂施能濟人困從兄子大鵬有力習騎射貧爲人傭紹璣告父立元時資給之賴以成立大鵬字蔚叢嘉慶七年一甲二名武進士官二等侍衛揀發湖北遊擊累遷沅州協副將道光九年以奏對稱

旨擢廣東潮州鎮總兵官仕楚粵二十餘年綏靖苗變具有成績大鵬既貴感紹璣撫育恩乃請以己官封立元爲武功將軍紹璣卒年八十七

府志

楊起蘭字清池新建人刻苦爲學久不遇遂以貲爲國子生母患目疾左右奉養婦孺皆化之母如未嘗病目者鄉里有義舉皆身爲之倡推爲長者生平無疾言遽

色

府志

尚谿字治滋南昌人諸生父元弼善書工文谿承家學幼有神童之譽比長好博觀下筆千言以局居鄉里艱得異書遂遊江浙獲覩諸家藏皮學益廣屢試不遇入廣東學使幕出游河南厯主三山聚星崇實書院

府志

萬承彝字肯耘南昌人諸生邃於經史之學從游者數

百人萬氏故以文學世其家承彝魁然繼從父廷蘭之業執經門下者或入居侍從出爲方面諸從亦影纓結綬各見位業承彝猶困一衿泊如也同里彭邦疇詹事督學粵東聘入幕粵東英俊多出薦拔居鄉以敦風俗厚人心爲本家祠家譜立法井然年六十八始由歲貢生中道光鄉試年七十一授南康府教授

府志

胡元字順之新建人拔貢生權知黟縣改婺源補旌德皆有政聲黟富民某僕婦失足墜樓死僕誣其主爲昭雪之婺源有愬民抗糧毆差者曰糧固不可抗差得毋有可毆之道乎不予深究官旌德最久城垣書院義倉祠廟廨署次第興舉而民不煩以忤郡守鐫秩歸遂卒

府志

徐士穀原名文炳字稼生豐城人道光進士改庶吉士授編修前後累充江南四川福建鄉試考官順天鄉試會試同考官入直

上書房累拜珍賞方四川秋試竣事旋授學政以事被議降三級咸豐初元賞還編修擢侍講侍讀歷充

日講起居注官以憂歸哀毀三年如一日服闋座主大學士倭仁遺書詢出處穀以哀思未忘謝旋卒年六十有三生平博學多通在官禁苞苴所取多知名士

府志

帥方蔚字叔起一字子文奉新人性英敏七歲就學日誦千言年十四補諸生第一督學李鈞簡異之以爲晏同叔一流人也巡撫秦承恩先福皆器賞方蔚招之讀書署中手鈔二十四史諸子文選成帙又嘗從上元梅

冲游冲故名孝廉學有原本方蔚遂日益進道光六年
成進士第三人授職編修八年充山東鄉試副考官累
擢京畿道監察御史旋乞歸方蔚性好義家居爲邑中
購公產有租米三千石凡赴試者取給焉又爲廣華堂
置田租千石爲邑文武諸生供學師修脯鄉里德之主
講白鹿經訓書院督勛公明一時有眞經師之譽咸豐
中以國防功加道銜同治九年重與鹿鳴筵宴巡撫劉
坤一聘修通志無疾卒

府志
續輯

劉于潯字養素南昌人道光鄉舉大挑河工知縣補清
河未幾擢通判以憂歸咸豐初粵寇變起于潯率團勇
隨官軍勦賊敘功遷知府五年侍郎曾國藩督軍江西
始立江軍水師奏以于潯爲統領兩克樟樹鎮復豐城

新淦浮梁撫州臨江及安徽建德諸郡縣嘗追賊馬田
攻陶家壘強武爲江右第一同治三年江皖閩浙逸賊
入江西眾號數十萬于潯方駐撫州所將僅二千人賊
攻文昌橋親督將士晝夜血戰賊旣敗乘夜復進攻于
潯知賊必至嚴陣以待斃其悍酋賊遂不支自于潯統
江軍累戰皆捷積功

賞花翎圖薩太巴圖魯勇號累擢至甘肅按察使遇缺題奏布
政使未之官以疾引退于潯天性友愛老而彌篤保衛
桑梓不遺餘力比戶尸祝婦孺咸能道其姓氏年七十
一卒光緒四年巡撫劉秉璋奏請優卹

特贈內閣學士從祀張芾江忠源祠

採訪
事實

姜曾字懷哲南昌人道光鄉舉肆力於學博聞強識爲

諸生時試輒冠曹學政吳其濬舉優貢第一尤以經術著稱與同邑尚鎔有姜經尚史之目所居有巨樟樹構巢其上號曰樟園書巢

府志

龔世增字省三

一作山

南昌人道光舉人咸豐六年揀發

貴州知縣署鎮甯州甫莅任狎夷恃險爲亂民多遷避世增募勇守隘暇卽按行田里爲請蠲緩以紓其困由是民多歸業巡撫蔣蔚遠以爲能丁本生父憂奏請留任九年賊擾州境從知府周夔破其巢斬首四百級撫降眾百餘寨敘功加同知銜開州苗亂執署知州戴某大吏檄世增往剿且令受代至則破賊於格兜堡毛栗柯又襲悍賊秦九巢殲之進羊腸破打兒窩賊巢旋以計襲賊挈戴某出解散脅從萬餘人以直隸州升用續

丁本生繼母憂復奏留之同治初署鎮遠縣兼理施秉
事兵燹後數十里無炊煙世增招集流亡民歸之如市
署鎮遠府駐防玉屏縣苗匪陷天柱遣師復之苗知城
中兵少遂攻玉屏相持數十日始退未幾復至城遂陷
世增戰死妾祝氏僕彭仁松殉焉

詔賜祭葬予世職入祀貴州及本省昭忠祠

府志
忠義錄

徐樹楠字南生奉新人道光進士授四川昭化知縣調
浙江龍游兩充鄉試同考官移知錢塘日坐堂皇遇訟
立決一時稱神明擢禮部精膳司主事大吏奏留改杭
州東防同知加知府銜承修海塘悉臻完固丁內艱貧
不能歸以寇警襄理軍務咸豐十年二月杭州陷樹楠
防守鎮東樓力竭死之贈光祿寺卿入祀浙江名宦祠

並於杭州建立專祠

府志 南昌府 浙撫 梅啟照疏

張金璧字振廷南昌人以千總從總兵清保出征湖南防郴州事竣巡撫張芾令駐萍鄉咸豐三年賊圍省城統前營兵四百分守永和門擊賊屢有功轉戰瑞州撫州建昌間擢守備從總兵李定泰剿賊於進賢東鄉以病歸被議削職旋從劉于濬訓練江軍九年復景德鎮十年克建德縣張芾在皖南檄統果健軍芾內召從提督鮑超敗賊赤岡嶺開復原官以都司用

賞花翎十一年從援涇縣克西河等隘中礮陣亡

詔視遊擊賜卹予世襲雲騎尉

縣志 忠義錄

冷昱瀛

一作 昱瀛

字仙洲義甯人歲貢生道光癸卯防禦湖

北崇陽賊以功授訓導旋補都昌未莅任咸豐初粵賊

偏義甯昱瀛請於父元壽捐貲募勇與弟九品銜其炳
監生永熙伯溫子崑生從子九品銜一陽武童定元等
分駐巒頭枯竹二嶺季子忠勉年十五亦荷戈從州人
呼爲父子兵與賊相持四閱月屢敗之賊僞爲遠竄者
棄營遁昱瀛悉眾追之而賊已由閒道奪隘入縱火焚
邨舍昱瀛見火起號於眾曰屋宇已燼無可繫念乘賊
深入可盡殲也遂與弟武生伯良翰林院孔目廣修九
品銜伯福力戰於洞下源斃賊甚夥源水爲之赤賊稍
退旋偵團勇無他援復大至昱瀛與其炳永熙伯溫忠
勉一陽定元及義勇四十三人同時戰歿元壽被擒昱
瀛父子瞻淇號泣願以身代賊兩釋之伯良伯福廣修
以一門死大慟未幾皆卒昱瀛其炳永熙伯溫俱

賜卹祀本省昭忠祠

府志忠義錄

江西南昌府

三

黃得雨義甯州人以武舉署九江千總賊犯郡率所部

迎勦九戰皆捷咸豐三年乞假歸四年賊由通山犯州

西鄙竄渣津知州葉濟英知得雨勇檄督團勇禦之以

武生

一作監生

戴邦懷爲副瀕行馬驚蹶有尼之者得雨不

可易騎往馳至渣津入賊陣斬數十人賊敗走得雨窮

追至桃樹港賊窘亟棄器械輜重於道眾爭取之行列

散亂賊反鬪遂潰得雨旣奪圍出知邦懷驚賊執慨然

曰與人同出不與同入非夫也復馳入圍中援之時賊

已殺邦懷悉銳攻得雨馬蹶踣地身中百餘創遂死贈

都司子世襲雲騎尉

府志忠義錄

許獻琛字費庵奉新人諸生少孤事母至孝侍母病三

年衣不解帶教授鄉里恪守宋儒書尤務經世之學倡
許氏義倉遭粵賊亂全活甚眾復捐貲爲惠鄰倉建圖
南書院教養邑士咸豐初賊陷縣城官軍累攻弗下獻
琛糾團丁數萬人助之城始拔獻琛初以子貴受封至
是敘功有

旨賞給三品頂戴卒年八十四

採訪事實

吳坤修字子厚新建人國子生累試不過拔例以末秋
赴湖南從總督裕泰剿李沅發事平論功進一階咸豐
初侍郎曾國藩軍敗九江舟師陷內湖不得出檄坤修
走南康領其軍坤修單騎往移師吳城軍復振旋克都
昌駐防瑞洪六年湖北巡撫胡林翼立彪營使坤修與
劉騰鴻普承堯分統援江西復新昌上高進規瑞州尋

由新昌下安義靖安遂復奉新積功

賞花翎擢廣東南韶連道緣事落職九年以巡撫耆齡奏辦團練再督軍援安徽克建德復原官尋由郭卹回援江西敗賊於鄧家埠斬馘無算同治三年以克江南金保圩諸隘功

賞布政使銜金陵復記名以按察使遇缺題奏四年署徽甯池太廣道補安徽按察使五年署布政使權巡撫旋授布政使以勞病卒官年五十七巡撫英翰奏坤修前後戰績及掘巡撫時息民綏境功奉

旨照布政使議卹贈內閣學士銜廕一子入監

管樂撰
行狀

吳修考字菊莊坤修弟勇敢有謀略咸豐初從征湖北佐湘軍唐訓方轉戰通城崇陽蒲圻咸甯皆有功授把

總會師武昌賊於保安門外爲重濠牛馬牆以守巡撫
胡林翼睨而歎曰此何時可破修考率爾對曰次夕曰
汝能乎曰能然則需兵幾何曰無需也請預令諸軍見
垣中火起併力奪城耳次夕挈一卒泅城濠偪垣下然
火彈擲之賊大驚諸軍乘之破其壘奏擢千總從其兄
坤修援江西連克新昌上高偪瑞州城而營擢守備分
兵克奉新擢都司還攻瑞州賊乘夜襲寶勇營修考率
敢死士馳救之賊遁遂復其城擢遊擊未幾坤修被議
修考亦告歸胡林翼飛檄招之引軍屯石牌賊渠陳玉
成糾眾數十萬自舒桐上竄官軍徼之小池驛修考負
傷力戰不少卻擢叅將旋從道員蕭翰慶援浙江移師
皖南以克太平石埭功擢副將湖州被圍翰慶自甯國

援之軍次同心橋距湖州僅一舍賊屬至戰不利翰慶
死之親軍張元發欲挾修考泗水遁修考叱曰帥死吾
生生將安往揮元發去陷陣死賊裂其屍修考馭士嚴
而有恩人皆樂爲之用從軍六年大小數百戰屢受重
傷卒以身殉焉贈總兵予世襲騎都尉

府志
忠義錄

陳夢松字立猷靖安人諸生咸豐四年武甯土匪導粵
賊窺縣夢松與同邑舒孔安等力戰破之以功敘訓導
五年賊數萬窺塘埠塘埠地當四衝其西南可入奉新
武甯北有閒道踰河達安義東則徑至靖安城下夢松
率團丁連破賊於各隘口鄰團嚮應乃以糧械屬曾獻
謨而身任戰事駐營黃茅嶺扼塘埠門戶六年賊分路
來犯卒不下賊伺南路稍懈自蹊徑緣山入眾遂潰從

九品黃鵠翔諸生羅鳳喈皆戰死夢松聞警自黃茅嶺
馳援力竭被執賊誘之降怒罵不絕賊割其舌猶含血
憤罵乃殺之標識其名而去羣從伯坊伯垣伯懋伯懋
伯懋仲景皆死之

詔贈夢松

鹽運司知事卹廕如例獻謨亦以諸生敘八品銜聞

賊奪隘亟赴援賊已至門外遂與搏戰其子翔萬懷孔

趨助之同時遇害

府志忠義錄

余源字環桃武甯人諸生父瓚馨舉人在籍治團練咸
豐四年賊擾縣境源與弟溱分守隘口諸弟演淵暨子
姪輩多未冠者皆荷戈擊賊賊大北奪旗械甚多會別
賊自閒道至團勇驚潰源兄弟及族人監生聯馨一作聯聲
俊興采芹諸生時等俱戰歿團勇死者三百餘人瓚馨

猶督後隊力鬪賊卒退

詔獎其一門忠孝准於本籍建立專祠卹廕如例瓚馨有團練

策十二條各州縣咸以爲式

府志忠義錄

徐震輝字善詞義甯人咸豐五年賊圍州城震輝率其子盈杏盈梅姪盈杭盈束盈健盈均盈華日夜巡城上且散所積錢數千緡以贍軍知州葉濟英深倚之五月賊由西門爲隧道入城遂陷震輝率子姪巷戰遇賊鸚鵡橋手刃數賊已而賊大至盈束盈華中槍死震輝父子被執賊誘之降不屈盈均盈健問震輝被縛排闥入以拳擊賊踣地蹴之立斃羣賊大駭叢刺之二人均死震輝哭之慟賊遂磔其父子盈杭聞之亦投井死奉

旨賜卹入祀昭忠祠

州志忠義錄

董朝佐字廷球義甯人武生饒膽識率園丁擊賊屢有
功咸豐四年賊竄九江從總兵趙如勝往援授六品頂
帶次年賊圍州城朝佐督捷勇守迎恩門晝夜不少懈
城陷猶大呼迎戰手刃數人力屈被執賊偉其貌取錦
袍覆之時守備楊應川已從賊並勸朝佐降朝佐罵曰
汝亦命官忍從賊邪奪佩刀斬之羣賊遂殺朝佐血濺
賊面後爲血濺者皆生疽死

州志忠義錄

王昭贊義甯人九品銜目瞽能任事咸豐四年賊犯州
境昭贊以大義激鄉人集者數千乘肩輿督戰屢有功
授六品頂帶五年賊圍城昭贊率所部助守及城陷被
執賊憐而食之昭贊抵盃於地罵曰汝以我爲瞽邪瞽
於目不瞽於心汝輩狗彘顧食我賊怒殺之弟曰贊浩

贊子裕虞從殉焉

州志忠義錄

余仲鼇字惠東義甯人咸豐四年二月賊犯境仲鼇率團勇迎擊於梁口大敗之三月賊圍州城仲鼇馳救圍立解五月賊屯武甯之清江從官軍勦之賊敗退尋踞武甯城屢犯洋湖港口頻戰皆大捷以前後功敘千總十月遂復武甯巡撫陳啟邁檄赴吳城進勦饒州安仁都昌均有功五年四月回里適別賊陷州城仲鼇力戰被執賊知其名誘之降仲鼇大罵賊怒遂磔之

府志忠義錄